

明
史

八
六

新學堂

PDG

明史卷三百十二

列傳第二百

總裁官總理事務 經筵講官 保奏太子太孫 翰林大學士兼管 吏部尚書加六級張廷玉等奉

敕修

四川土司二

播州宣慰司

永寧宣撫司

酉陽宣撫司

石砭宣撫司

遵義府卽播州秦爲夜郎且蘭地漢屬牂牁唐貞觀中
改播州乾符初南詔陷播太原楊端應募復其城爲播
人所懷服歷五代子孫世有其地宋大觀中楊文貴納
土置遵義軍元世祖授楊邦憲宣慰使賜其子漢英名

賽因不花封播國公洪武四年平蜀遣使諭之五年播
州宣慰使楊鏗同知羅琛總管何嬰蠻夷總管鄭瑚等
相率來歸貢方物納元所授金牌銀印銅章詔賜鏗衣
幣仍置播州宣慰使司鏗琛皆仍舊職領安撫司二曰
草塘曰黃平長官司六曰眞州曰播州曰餘慶曰白泥
曰容山曰重安以嬰等爲長官七年中書省奏播州土
地旣入版圖當收其貢賦歲納糧二千五百石爲軍儲
帝以其率先來歸田稅隨所入不必以額已復置播州
黃平宣撫司播州江渡蠻黃安作亂貴州衛指揮張岱
討平之八年鏗遣其弟錡來貢賜衣幣自是每三歲一

入貢十四年遣使齎敕諭鏗比聞爾聽浮言生疑貳今
大軍南征多用戰騎宜率兵二萬馬三千爲先鋒庶表
爾誠十五年城播州沙溪以官兵一千人土兵二千人
戍之改播州宣慰司隸貴州改黃平衛爲千戶所十七
年鏗子震卒於京命有司歸其喪二十年徵鏗入朝貢
馬十匹帝諭以守土保身之道賜鈔五百錠二十一年
播州宣慰使司井所屬宣撫司官各遣其子來朝請入
太學帝敕國子監官善訓導之永樂四年免播州荒田
租設重安長官司隸播州宣慰司以張佛保爲長官以
佛保嘗招輯重安蠻民嚮化故也七年宣慰使楊昇招

諭草塘黃平重安所轄當科葛雍等十二寨蠻人來歸
宣德三年昇賀萬壽節後期禮部議予半賞帝以道遠
勿奪其賜七年草塘所屬穀傲等四十一寨蠻作亂總
兵陳懷勦撫之旋定正統十四年宣慰使楊綱老疾以
其子輝代景泰三年輝奏湖貴所轄臻剖五仝等苗賊
糾合草塘江渡諸苗黃龍韋保等殺掠人民屢撫復叛
乞調兵征勦以靖民患帝命總督王來總兵梁瑤等會
同四川巡撫勦之七年調輝兵征銅鼓五開叛苗賜敕
頒賞成化十年以播州賊齎果等屢歲爲患敕責川貴
鎮巡官正統末苗蠻聚衆寇邊土官同知羅宏奏輝有

疾乞以其子愛代帝命愛襲職仍敕愛卽率兵從總兵官勦賊先是輝奏所屬天壩干地五十三寨及重安所轄灣溪等寨屢被苗蠻占據乞令湖貴會兵征之命如輝言部議以愛年幼請仍起輝暫理軍事又以輝難獨任宜敕都御史張瓚親至播州督理勵輝等振揚威武以備征調其機宜悉聽瓚裁處十二年瓚督諸軍及輝攻敗灣溪天壩干地諸苗凡破山寨十六斬首四百九十六級撫男婦九千八百餘口事下兵部以苗就撫者多宜量爲處分瓚議設安寧宣撫司并懷遠宣化二長官司建靖南龍場二堡命輝董其役輝調兵民五千餘

立治所委所屬黃平諸長官分甃城垣將竣輝因奏各寨苗蠻近頗知懼但大軍還後難保無虞播州向設操守土兵一千五百人今撥守懷遠靖南天漂龍場各二百人宣化百人安寧六百人其家屬宜徙之同居爲固守計其工之未畢者宜命臣子愛董之而聽臣致仕如故詔從之時灣溪旣立安寧宣撫爛土諸蠻惡其逼遂引齎果等攻陷天漂靖南城堡圍安寧愛新襲力弗能支求援於川貴二鎮兵部奏起輝再統兵剿之又敕川貴兵爲助十五年貴州巡撫陳儼奏苗賊齎果轉橫乞調川湖等官軍五萬五千剋期會貴州聽儼節制兵部

言賊作於四川而貴州守臣自欲節制諸軍恐有邀功
之人主之且興師五萬以半年計須軍儲十三萬五千
石山路險峻輸運之夫須二十七萬衆況天將暑瘴癘
可虞帝然其奏二十二年愛兄宣撫楊友訐奏愛帝命
刑部侍郎何喬新往勘二十三年喬新奏輝在日溺其
庶子友欲令承襲長官張淵阿順之安撫宋韜謂楊氏
家法立嗣以嫡愛宜立輝不得已立愛又欲割地以授
友謀於淵因以天壩干乃本州懷遠故地爲生苗所據
請兵取之容山長官韓瑄以土民安輯日久不宜征淵
與輝計執瑄杖殺之前巡撫張瓚受輝賂以其地設安

寧宣撫司冒以友任宣撫輝立券以所有金玉服用莊田召諸子均分之輝沒淵乃與友潛謀刺愛淵弟深亦與謀不果友遂奏愛居處器用僭擬朝廷又通唐府密書往來私習兵法天文謀不軌事皆誣帝命斬淵深以愛信讒薄兄友因公擅殺且謀嫡盜官錢皆有罪愛贖復任友遷保寧羈管仍敕喬新從宜處治弘治元年增設重安守禦千戶所命播州歲調土兵一千助戍守七年以平苗功賜敕勞愛十四年調播州兵五千征貴州賊婦米魯等正德二年陞播州宣慰使楊斌爲四川按察使仍理宣慰事舊制土官有功賜衣帶或旌賞部衆

無列銜方面者斌狡橫不受兩司節制諷安撫羅忠等
上其平普安等戰功重賂劉瑾得之踰年巡按御史俞
緇言不宜授乃裁之仍原職初友旣編置保寧愛益恣
厚斂以賄中貴征取友向所居凱里地者獨苛同知楊
才居安寧乘之朘剝尤甚諸苗憤怨凱里民爲友奏復
官弗得乃潛入保寧以友還糾衆作亂攻播州焚愛居
第及公私廨宇略盡遂殺才多所殘戮愛屢奏於朝帝
命鎮巡官調兵征之會友死遂緩師已而鎮巡官言友
子弘能悔過自新且善撫馭蠻衆願聽其約束其前爲
友所焚殺者俱已隨土俗折償且還所侵奪於官乞授

弘冠帶爲土舍協同播州經歷司撫輯諸蠻其家衆置保寧者仍歸之隸播州管轄并諭斌與弘協和不得再造釁端報可未幾播州安撫宋淮奏貴州凱口爛土苗婚於凱離草塘諸寨陰相構結誘山苗爲亂乞賜斌敕令每年巡視邊境會湖廣鎮巡官撫處部議土官向無領敕出巡者諭斌宜撫綏土衆輯睦親族以副朝廷優待之意因授致仕宣慰愛爲昭毅將軍給誥命賜麒麟服時斌又爲其父請進階及服色禮科駁之以服色等威所繫不可假兵部以愛舊有剿賊功皆許之斌復爲其子相請入學并得賜冠帶十二年播州安撫羅忠宋

淮等奏斌有父喪欲援文臣例守制但邊防爲重乞仍令掌印理事初楊宏旣歸凱里與重安土舍馮綸等有怨宏卒綸等誘苗蠻攻之更相仇殺侵軼貴州境巡撫鄒文盛言狀且請移文四川會官撫處踰歲不報文盛乃遣參議蔡潮入播州督致仕楊斌撫平之因言宜復安寧宣撫俾宏子弟襲之斌未衰宜仍起任事以制諸蠻寨潮有撫蠻勞宜量擢兵部議安寧已革不可復斌子旣代亦不可起土官應襲與否屬四川非黔所得專盛所請難行而功不可誣十六年賜斌蟒衣玉帶嘉靖元年賜播州儒學四書集註從宣慰楊相奏也宏旣死

其弟張求襲職不得時盜邊劫白泥司印信復與相搆
兵守臣乞改凱里屬貴州以張爲土知州解釋之兵部
議張習父兄之惡幸免於辜敢肆然執印信以要挾當
命川貴守臣按其前後爭產殺人諸罪寘於理若張悔
過輸情還所獲印尚可量授一官聽調殺賊以自効倘
或怙終必誅以爲玩法戒旣遂許張襲宣撫而改安寧
爲凱里隸貴州初楊相之祖父皆以嫡庶相爭梯禍數
世至是相復寵庶子煦嫡子烈母張悍甚與烈盜兵逐
相相走客死水西烈求父屍宣慰安萬銓因要挾水烟
天旺故地而後予屍烈陽許之及相喪還烈靳地不予

遂與水西構難又殺其長官王黻時嘉靖二十三年也烈旣代襲遂與黻黨李保治兵相攻垂十年總督馮岳調總兵石邦憲討平之眞州苗盧阿項者亦久稱亂邦憲以兵七千擊敗之有言賊求援於播者邦憲曰吾方調水西兵聲揚烈助逆罪烈暇救人乎己禽阿項父子斬獲四百餘人初嘉靖初議分凱里屬貴州旣又以播地多在貴州境并改屬思石兵備及眞州盜平地方安靖播人以爲非便川貴守臣異議不決命總督會勘總督奏仍以播歸四川而貴州思石兵備仍兼制播酉平邑諸土司事報可隆慶五年烈死子應龍請襲命子職

萬曆元年給應龍宣慰使敕書八年賜故宣慰楊烈祭葬從應龍請也十四年應龍獻大木七十材美賜飛魚服又復引其祖斌賜蟒例部議以斌有軍功且出特恩未可爲比帝命以都指揮使銜授應龍十八年貴州巡撫葉夢熊疏論應龍兇惡諸事巡按陳效歷數應龍二十四大罪時方防禦松潘調播州土兵協守四川巡按李化龍疏請暫免勘問俾應龍戴罪圖功由是川貴撫按疏辨在蜀者謂應龍無可勘之罪在黔者謂蜀有私暱應龍之心於是給事中張希臯等以事屬重大兩省利害豈漫不相關者乞從公會勘無執成心十九年夢

熊主議播州所轄五司改土爲流悉屬重慶與化龍意復相左化龍遂引嫌求斥蓋應龍本雄猜阻兵嗜殺所轄五司七姓悉叛離嬖妾田屠妻張氏并及其母妻叔張時照與所部何恩宋世臣等上變告應龍反夢熊請發兵剿之蜀中士大夫悉謂蜀三面鄰播屬裔以什伯數皆其彈壓且兵驍勇數征調有功剪除未爲長策以故蜀撫按並主撫朝議命勘應龍願赴蜀不赴黔二十一年應龍詣重慶對簿坐法當斬請以二萬金贖御史張鶴鳴方駁問會倭大入朝鮮徵天下兵應龍因奏辨且願將五千兵征倭自贖詔釋之兵已啟行尋報罷巡撫

王繼光至嚴提勘結應龍抗不出張時照等復詣奏闕下繼光用兵之議遂決二十一年繼光至重慶與總兵劉承嗣等分兵三道進婁山關屯白石口應龍佯約降而統苗兵據關衝擊承嗣兵敗殺傷大半會繼光論罷卽撤兵委棄輜重略盡黔師協剿亦無功時四川新撫譚希忠與貴州鎮撫再議剿御史薛繼茂主撫應龍上書自白遣其黨攜金入京行間執原奏何恩詣綦江縣二十二年以兵部侍郎邢玠總督貴州二十三年玠至蜀察永寧酉陽皆應龍姻媾而黃平白泥久爲仇讐宜剪其枝黨乃檄應龍謂當待以不死會水西宣慰安疆

臣請父國亨卹典兵部尚書石星手札示疆臣趣應龍
就吏得貫疆臣奉札至播招應龍時七姓恐應龍出得
除罪而四方亡命竄匿其間又幸龍反因以爲利驛傳
文移輒從中阻玠檄重慶知府王士琦詣綦江趣應龍
安穩聽勘應龍使弟兆龍至安穩治郵舍儲糒叩頭郊
迎致餼牽如禮言應龍縛渠魁待罪松坎所不敢至安
穩者恐墮安穩仇民不測禍也幸請至松坎受事士琦
曰松坎亦曩奏勘地卽單騎往應龍果面縛道旁泣請
死罪願執罪人獻罰金得自比安國亨國亨者曩亦被
訐懼罪不出界故應龍引之士琦爲請于玠許之應龍

乃縛獻黃元等十二人案驗抵應龍斬論贖輸四萬金助採木仍革職以子朝棟代次子可棟羈府追贖黃元等斬重慶市總督以聞時倭氛未靖兵部欲緩應龍事東方朝廷亦以應龍向有積勞可其奏於松坎設同知治焉以士琦爲川東兵備副使彈治之應龍獲寬益怙終不悛尋可棟死於重慶益痛恨促喪歸不得復檄完贖大言曰吾子活銀卽至矣擁兵驅千餘僧招魂去分遣土目置關據險厚撫諸苗名其健者爲硬手州人稍殷厚者沒入其貲以養苗苗人咸願爲出死力二十四年應龍殘餘慶掠大阡都壩焚劫草塘餘慶二司及興

隆都勻各衛又遣其黨圍黃平戮重安長官家勢復大熾二十五年流劫江津及南川臨合江索其仇袁子升絕城下磔之時兵備王士琦調征倭應龍益統苗兵大掠貴州洪頭高坪新村諸屯已又侵湖廣四十八屯阻塞驛站訶原奏仇民宋世臣羅承恩等挈家匿偏橋衛襲破之大索城中戮其父母淫其妻女備極慘酷二十七年貴州巡撫江東之令都司楊國柱部卒三千勦應龍奪三百落賊佯北誘師殲焉國柱等盡死東之罷以郭子章代而起李化龍節制川湖貴州諸軍事調東征諸將劉綎麻貴陳璘董一元南征時應龍乘大兵未集

勒兵犯綦江城中新募兵不滿三千賊兵八萬奄至游擊張良賢巷戰死綦江陷應龍盡殺城中人投屍蔽江水爲赤益結九股生苗及黑脚苗等爲助屯官壩聲窺蜀已遂焚東坡爛橋楚黔路梗二十八年應龍五道並出破龍泉司時總督李化龍已移駐重慶徵兵大集遂以二月十二日誓師分八路進每路約三萬人官兵三之士司七之旗鼓甲仗森列苗大驚總兵劉綎破其前鋒楊朝棟僅以身免賊膽落遂連克桑木烏江渡三關奪天都三百落諸囤賊連敗乃乘隙突犯烏江詐稱水西隴澄會哨誘永順兵斷橋淹死將卒無算尋綎破九

盤入婁山關關爲賊前門萬峰插天中通一線縱從間
道攀藤毀柵入陷焉四月朔師屯白石應龍率諸苗決
死戰縱親勒騎衝中堅分兩翼夾擊敗之追奔至養馬
城連破龍爪海雲險圍壓海龍圍賊所倚天險謂飛鳥
騰猿不能逾者時偏沅師已破青蛇圍安疆臣亦奪落
濠關至大水田焚桃溪莊賊見勢急父子相抱哭上圍
死守每路投降文緩師總兵吳廣入崖門關營水牛塘
與賊力戰三日却之賊詭令婦人於圍上拜表痛哭云
田氏且降復詐爲應龍仰藥死報廣廣輕信按兵已覘
賊詐益厲兵攻燒二關奪賊樵汲路入路師大集海龍

圍遂築長圍更番迭攻賊知必死會化龍聞父喪詔以
縗墨視師化龍念賊前圍險不能越令馬孔英率勅兵
併力攻其後天苦雨將士馳泥淖中苦戰六月四日天
忽霽縗先士卒克土城應龍益迫散金募死士拒戰無
應者起提刀巡壘見四面火光燭天大兵已登圍破土
城入應龍倉皇同愛妾二閨室縊且自焚吳廣獲其子
朝棟急覓應龍屍出焰中賊平計出師至滅賊百十有
四日八路共斬級二萬餘生獲朝棟等百餘人化龍露
布以聞獻俘闕下剉應龍屍磔朝棟兆龍等於市播州
自唐入楊氏傳二十九世八百餘年至應龍而亡三十

一年播州餘逆吳洪盧文秀等叛總兵李應祥等討平之分播地爲二屬蜀者曰遵義府屬黔者爲平越府

永寧唐蘭州地宋爲瀘州江安合江二縣境元置永寧路領筠連州及騰川縣後改爲永寧宣撫司洪武四年平蜀永寧內附置永寧衛六年筠連州滕大寨蠻編張等叛詐稱雲南兵據湖南長寧諸州縣命成都衛指揮袁洪討之洪引兵至敘州慶符縣攻破清平關禽僞千戶李文質等編張遁走復以兵犯江安諸縣洪追及之又敗其衆焚其九寨獲編張子僞鎮撫張壽編張遁匿溪洞餘黨散入雲南帝聞之敕諭洪曰南蠻叛服不常

不足罪既獲其俘宜編爲軍且駐境上必以兵震之使
警天威無遺後患未幾張復聚衆據滕大寨洪移兵討
敗之追至小芒部張遁去遂取得花寨禽阿普等自是
張不敢復出其寨悉平遂降筠連州爲縣屬敘州以九
姓長官司隸永寧安撫司七年陞永寧等處軍民安撫
司爲宣撫使司秩正三品八年以祿照爲宣撫使十七
年永寧宣撫使祿照貢馬詔賜鈔幣冠服定三年一貢
如例十八年祿照遣弟阿居來朝言比年賦馬皆已輸
惟糧不能如數緣大軍南征蠻民驚竄耕種失時加以
兵後疾疫死亡者多故輸納不及命蠲之二十三年永

寧宣撫言所轄地水道有一百九十灘其江門大灘有
十二處皆石塞其流詔景川侯曹震往疏鑿之二十四
年震至瀘州按視有枝河通永寧乃鑿石削崖以通漕
運二十六年以祿照子阿聶襲職先是祿照坐事逮至
京得直還卒於途其子阿聶與弟智皆在太學遂以庶
母奢尾署司事至是奢尾入朝請以阿聶襲從之永樂
四年免永寧荒田租宣德八年故宣撫阿聶妻奢蘇朝
貢九年宣撫奢蘇奏生儒皆土獠朝廷所授官言語不
通難以訓誨永寧監生李源資厚學通乞如雲南鶴慶
府例授爲儒學訓導詔從之景泰二年減永寧宣撫司

稅課局鈔以苗賊竊發客商路阻從布政司請也成化元年山都掌大壩等寨蠻賊分劫江安等縣兵部以聞二年國子學錄黃明善奏四川山都掌蠻屢歲出沒殺掠良民景泰元年招之復叛天順六年撫之又反近總兵李安令永寧宣撫奢貴赴大壩招撫亦未效恐開釁無已宜及大兵之集早爲定計毋釀邊患三年明善復言宋時多剛縣蠻爲寇用白芳子兵破之白芳子者卽今之民壯多剛縣者卽今之都掌多剛寨也前代用鄉兵有明效宜急募民壯以助官軍都掌水稻十月熟宜督兵先時取其田禾則三月之內蠻必餒矣軍宜分三

路南從金鷺池攻大壩中從戎縣攻箐前北從高縣攻都掌小寨破大寨自拔又大壩南百餘里爲芒部西南二百里爲烏蒙令二府土官截其險要更用火器自下而上順風延蕪寨必可攻且征調土兵須處置得宜招募民壯須賞罰必信詔總兵官參用之時總督尚書程信亦奏都掌地勢險要必得土兵嚮道請敕東川芒部烏蒙烏撒諸府兵並速調湖廣永順保靖兵以備征遣又請南京戰馬一千應用皆報可四年信奏永寧宣撫奢貴開通運道禽獲賊首宜降璽書獎賚從之十六年白羅羅羿子與都掌大壩蠻相攻禮部侍郎周洪謨言

臣敘人也知敘蠻情戎珙筠高諸縣在前代皆土官國朝始代以流言語性情不相習用激變洪永宣正四朝四命將徂征隨服隨叛景泰初益滋蔓至今爲梗臣向嘗言仍立土官治之爲久遠計而都御史汪浩傲幸邊功誣殺所保土官及寨主二百餘人諸蠻怨入骨髓轉肆劫掠及尚書程信統大兵僅能克之臣以謂及今順蠻人之情擇其衆所推服者許爲大寨主俾世襲庶可相安又言白羅羅者相傳爲廣西流蠻有衆數千無統屬景泰中糾戎珙苗攻破長寧九縣今又侵擾都掌其所居崖險籌深旣難剪滅亦宜立長官司治之地近芒

部宜卽隸之羿子者永寧宣撫所轄而永寧乃雲貴要衝南跨赤水畢節六七百里以一柔婦人制數萬強梁之衆故每肆劫掠臣以爲宣撫土獠仍令宣撫奢貴治之其南境寨蠻近赤水畢節要路者宜立二長官司仍隸永寧宣撫夫土官有職無俸無損國儲有益邊備從之二十五年永寧宣撫司女土官奢祿獻大木給誥如例萬曆元年四川巡撫曾省吾奏都蠻叛逆發兵征討土官奢効忠首在調但與貴州土官安國亨有讐請並令總兵官劉顯節制使不得藉口復讐妄有騷動從之初烏撒與永寧烏蒙水西霑益諸土官境相連復以世

戚親厚既而安國亨殺安信信兄智結永寧宣撫奢劾忠報讐彼此相攻而安國亨部下吏目與智有親恐爲國亨所殺因投安路墨墨詐稱爲土知府安承祖赴京代奏已而國亨亦令其子安民陳訴與奢劾忠俱奉命聽勘於川貴巡撫議照蠻俗罰牛贖罪報可劾忠死妻世統無子妾世續有幼子崇周世統以嫡欲奪印相讐殺方奏報間總兵郭成參將馬呈文利其所有遽發兵千餘深入落紅奢氏九世所積搜掠一空世續亦發兵尾其後劾忠弟沙卜出拒戰且邀水西兵報讐成兵敗績乃檄取沙卜於世統統不應復殺把總三人聚苗兵

萬餘欲攻永寧洩怨巡按劾成等邀利起釁宜逮而議
予二土婦冠帶仍分地各管所屬其宣撫司印俟奢崇
周成立赴襲理事報可十四年奢崇周代職未幾死奢
崇明者効忠親弟盡忠子也幼孤依世統撫養一十三
年至是送之永寧世續遺之羶馬許出印給之事已定
而諸奸閹宗傳等自以昔從世續逐世統殺沙卜懼崇
明立必復前恨遂附水西立阿利以自固安疆臣陰陽
其間蠻兵四出焚劫屯堡官兵不能禁總督以聞朝議
命奢崇明暫管宣撫事冀崇明蠲夙恨以收人心而閹
宗傳等攻掠永寧普寧摩尼如故崇明承襲幾一載世

續印竟不與且以印私安疆臣妻弟阿利巡撫遣都司
張神武執世續索印世續言印在鎮雄隴澄處隴澄者
水西安堯臣也隴氏垂絕堯臣入贅遂冒隴姓稱隴澄
敘平播州敘州功澄與焉中朝不知其爲堯臣也堯臣
外怙播功內仗水西有據鎮雄制永寧心蜀撫按以堯
臣非隴氏種無授鎮雄意堯臣以是懷兩端陰助世續
意世續得授阿利則已據鎮雄益堅又朝廷厭兵宗傳
阿利等方驛騷已可臥取隴氏也而閭宗傳等每焚掠
必稱鎮雄兵以怖諸部川南道梅國樓所俘蠻丑者言
鎮雄遣將魯大功督兵五營屯大壩水西兵已渡馬鈴

堡約攻永寧普市遂潰宗傳等以空城棄去奢崇明又
言堯臣所遣日把彭月政魯仲賢六人營助逆不退聲
言將抵敘南攻永寧瀘州於是總兵侯國弼等皆歸惡
於堯臣都司張神武等所俘喚者朗者皆鎮雄土目堯
臣亦不能解黔中撫按以西南多事兵食俱拙無意取
鎮雄堯臣因以普市摩尼諸焚掠皆歸之蜀將議者遂
以貪功起釁爲蜀將罪四川巡撫喬璧星言堯臣狡謀
欲篡鎮雄垂涎蘭地有年矣宗傳之背逆恃鎮雄猶鎮
雄之恃水西也水西疆臣不助兵臣已得其狀宜乘逆
孽未成令貴州撫按調兵與臣會勦倘堯臣稔惡如故

臣卽移師擊之毋使弗摧之虺復爲蛇弗室之罅復爲河也疏上廷議無敢決用師者久之阿利死印亦出蜀中欲逐堯臣之論卒不可解時播州清疆之議方沸騰黔蜀各紛紛至是永寧議兵又如聚訟矣時朝廷已一意休兵三十五年命釋奢世續赦閭宗傳等罪訪求隴氏子孫爲鎮雄後並令安疆臣約束堯臣歸本土司聽遙授職銜不許冒襲隴職於是宗傳降堯臣請避去黔督遂請撤師舊制永寧衛隸黔土司隸蜀自水蘭交攻軍民激變奢崇明雖立而行勘未報摩尼普市千戶張大策等復請將永寧宣撫改土爲流兵部言無故改流

置崇明何地命速完前勘諸案於是蜀撫擬張大策以失守城池罪應斬黔撫擬張仲武以擅兵劫掠罪亦應斬策黔人武蜀人也由是兩情皆不平諸臣自相構訟復紛結不解會奢崇明子寅與水西已故土官妻奢社輝爭地安兵馬十倍奢而奢之兵精兩相持蜀黔撫按不能制以狀聞四十八年黔撫張鶴鳴以赤水衛白撒所屯地爲永寧占據宜清還皆待勘未決天啓元年崇明請調馬步兵二萬援遼從之崇明與子寅久蓄異志借調兵援遼遣其壻樊龍部黨張彤等領兵至重慶久駐不發巡撫徐可求移鎮重慶趣永寧兵樊龍等以增

行糧爲名乘機反殺巡撫道府總兵等官二十餘員遂據重慶分兵攻合江納溪破瀘州陷遵義興文知縣張振德死之興文故九絲蠻地也進圍成都僞號大梁布政使朱爕元周著按察使林宰分門固守石砭土司女官秦良玉遣弟明屏姪翼明等發兵四千倍道兼行潛渡重慶營南坪關良玉自統精兵六千沿江上趨成都諸援兵亦漸集時寅攻城急陰納劉勲等爲內應事覺伏誅復造雲梯及旱船晝夜薄城城中亦以礮石擊毀之相持百日會賊將羅乾象遣人輸款願殺賊自効是夜乾象縱火焚營賊兵亂崇明父子倉皇奔錢帛穀米

委棄山積窮民賴以得活乾象因率其黨胡汝高等來
降時燮元已授巡撫率川卒追崇明江安新都遵義諸
郡邑皆復時二年三月也樊龍收餘衆數萬據重慶險
塞燮元督良玉等奪二郎關總兵杜文煥破佛圖關諸
將迫重慶而軍奢寅遣賊黨周鼎等分道來救鼎敗走
爲合江民所縛官軍與平茶酉陽石砭三土司合圍重
慶城中乏食燮元遂以計禽樊龍殺之張彤亦爲亂兵
所殺生禽龍子友邦及其黨張國用石永高等三十餘
人遂復重慶時安邦彥反於貴州崇明遙倚爲聲援三
年川師復遵義進攻永寧遇奢寅於土地坎率兵搏戰

大兵奮擊敗之寅被創遁樊虎亦戰死進克其城降賊
二萬復進拔紅崖天台諸固寨降者日至崇明勢益蹙
求救於水西邦彥遣十六營過河援之羅乾象急破蘭
州焚九鳳樓覆其巢崇明踉蹌走投水西邦彥與合兵
分犯遵義永寧川師敗之於芝蔴塘賊遁入青山諸將
逼渭河鑒入龍場陣獲崇明妻安氏及奢崇輝等斬獲
萬計蘭州平總督朱燮元請以赤水河爲界河東龍場
屬黔河西赤水永寧屬蜀永寧設道府與遵義建武聲
勢聯絡未幾貴州巡撫王三善爲邦彥所襲死崇明勢
復張將以踰春大舉寇永寧會奢寅爲其下所殺而燮

元亦以父喪去崇明邦彥得稽誅崇明稱大梁王邦彥號四裔大長老諸稱元帥者不可勝計合兵十餘萬規先犯赤水崇禎初起燮元總督貴湖雲川廣諸軍務大會師燮元定計誘賊深入向永寧邀之於五峰山桃紅壩令總兵侯良柱大敗之崇明邦彥皆授首是役也掃蕩蜀黔數十年巨憝前後皆燮元功云

酉陽漢武陵郡酉陽縣地宋爲酉陽州元屬紹慶府洪武五年酉陽軍民宣慰司冉如彪遣弟如喜來朝貢置酉陽州以如彪爲知州八年改爲宣撫司仍以冉如彪爲使置平茶邑梅麻兔石耶四洞長官司以楊底綱楊

金奉冉德原楊隆爲之每三年一入貢石耶不能親至
京命附於西陽二十七年平茶洞署長官楊再勝謀殺
兄子正賢及洞長楊通保等正賢等覺之逃至京師訴
其事且言再勝與景川侯謀反帝命逮再勝鞠之再勝
辭服當族誅正賢亦應緣坐帝誅再勝釋正賢使襲長
官西陽宣撫冉興邦以襲職來朝命改隸渝州永樂三
年指揮丁能杜福撫諭亞堅等十一寨生苗一百三十
六戶各遣子入朝命隸西陽宣撫司四年免西陽荒田
租五年興邦遣部長龔俊等貢方物並謝立儒學恩景
泰七年調宣撫僉事冉廷璋兵征五開銅鼓叛苗賜敕

諭賞賚天順十三年命進宣撫冉雲散官一階以助討
叛苗及禽石全州之功也弘治七年宣撫冉舜臣以征
貴州叛苗功乞陞職兵部以非例請進舜臣階明威將
軍賜敕褒之十二年舜臣奏宋農寨蠻賊糾脅諸寨洞
蠻殺掠焚劫乞勦捕保靖永順二宣慰亦奏邑梅副長
官楊勝剛父子謀據酉陽結俊倍洞長楊廣震等號召
宋農後溪諸蠻聚兵殺掠請並討兵部議酉陽溪洞連
絡易煽動宜卽撲滅請行鎮巡官酌機宜十四年調酉
陽兵五千協勦貴州賊婦米魯正德三年酉陽宣撫司
護印舍人冉廷璽及邑梅長官司奏湖廣鎮溪所洞苗

聚衆攻劫請兵勦捕八年宣撫冉元獻大木二十乞免男維翰襲職赴京從之二十年元再獻大木二十詔量加服色酬賞萬曆十七年宣撫冉維屏獻大木二十價逾三千工部議應加從三品服以爲上官輸誠之勸從之四十六年調酉陽兵四千命宣撫冉躍龍將之援遼四十七年躍龍遣子天允及文光等領兵赴遼陽駐虎皮黃山等處三載解奉集之圍再援瀋陽以渾河失利冉見龍戰沒死者千餘人撤守遼陽又以降敵縱火冉文煥等戰沒死者七百餘人兵部尚書張鶴鳴言躍龍遣子弟萬里勤王見龍旣殺身殉國躍龍又自捐金二

千兩運軍器至山海關振困招魂忠義可嘉臣在貴州時躍龍亦自捐餉征紅苗屢建奇功今又著節於邊宜加優恤以風諸邊天啓元年授躍龍宣慰使竝妻舒氏皆給誥命仍恤陣亡千七百餘家二年奢崇明叛躍龍率援師合圍重慶及崇明誅其土舍冉紹文與有功四年躍龍以東西赴調效命爲弟見龍及諸陣亡者請賚卹命下所司崇禎九年宣慰使冉天麟疏言庶孽天允假旨謀奪臣爵土不遂擅兵戕殺下撫按察勘時蜀方憂盜大吏自顧不暇土官事多寢閣云

石砮以石潼關砮蒲關而名後周置施州唐改青江郡

宋末置石砭安撫司元改石砭軍民府尋仍爲安撫司
洪武七年石砭安撫使馬克用遣其子付德與同知陳
世顯入朝貢方物八年改石砭安撫司爲宣撫司隸重
慶府十六年石砭溪蠻寇施州黔江守禦官軍擊破之
十八年石砭宣撫同知陳世顯遣子興潮等奉表貢方
物賀明年正旦二十四年賜石砭宣撫同知陳興潮及
其子文義白金百兩以從征散毛洞有功故也宣德五
年命宣撫馬應仁子鎮爲宣撫初應仁有罪應死貸謫
戍至是帝念其祖克用嘗効力先朝命求其子孫之良
者用之故有是命成化十八年四川巡撫孫仁奏三月

內盜三百人入石砭殺宣撫馬澄及隸卒二十餘人焚掠而去以石砭地鄰鄆都互爭銀場相訐有司不爲區治致相讐殺命責有司捕賊仁奏石砭歲辦鉛課五千一百三十斤正統後停之鄰境軍民假以徵課乘機竊取釀成禍階請除其課閉其洞仍移忠州臨江巡檢於鄆都南賓里之姜池以便防守從之是年命馬徽爲宣撫萬曆二十二年石砭女土官覃氏行宣撫事土吏馬邦聘謀奪其印與其黨馬斗斛斗霖等集衆數千圍覃氏縱火焚公私廬舍八十餘所殺掠一空覃氏上書言臣自從征疊茂擊賊大雪山斬首捕寇皆著有成勞屢

膺上官獎賞今邦聘無故虔劉孤寡臣豈不能出一旅與之角勝負誠以非朝命不敢也今叛人斯在請比先年楚金洞舍覃碧謀篡事願與邦聘同就吏二十三年命四川撫按讞其獄事未決會楊應龍反播州覃與應龍爲姻而斗斛亦結應龍兩家觀望獄遂解覃氏有智計性淫故與應龍通長子千乘失愛暱次子千駟謂應龍可恃因聘其女爲千駟妻千駟入播同應龍反千乘襲馬氏爵應調與西陽冉御龍同征應龍應龍敗千駟伏誅而千乘爲宣撫如故千乘卒妻秦良玉以功封夫人自有傳

明史卷三百一十二終

明史卷三百十三

列傳第三百一

總裁官總理事務 經筵講官少保兼太子太保和殿大學士兼管吏部尚書加六級張廷玉等奉

敕修

雲南土司

明洪武十四年大軍至滇梁王走死遂置雲南府自是諸郡以次來歸垂及累世規制咸定統而稽之大理臨安以下元江永昌以上皆府治也孟艮孟定等處則爲司新化北勝等處則爲州或設流官或仍土職今以諸府州槩列之土司者從其始也蓋滇省所屬多蠻夷雜處卽正印爲流官亦必以土司佐之而土司名目淆雜

難以縷析故係之府州以括其所轄而於土司事迹止
撫其大綱有關乎治亂興亡者載之俾控馭者識所鑒
焉

雲南土司一

雲南

大理

臨安

楚雄

澂江

景東

廣南

廣西

鎮沅

永寧

順寧

蒙化

孟良

孟定 耿馬安撫司附

曲靖

雲南滇國也漢武帝時始置益州郡蜀漢置雲南郡隋置昆州唐仍之後爲南詔蒙氏所據改鄯闡府歷鄭趙楊三氏至大理段氏以高智昇領鄯闡牧遂世其地元初置鄯闡萬戶府既改置中慶路封子忽哥爲雲南王鎮之仍錄段氏子孫守其土忽哥死其子嗣封爲梁王洪武六年遣翰林待制王禕等齎詔諭梁王久留不遣卒遇害八年復遣湖廣行省參政吳雲往中途爲梁使所害十四年征南將軍傅友德藍玉沐英率師至雲南

城梁王赴滇池死定其地改中慶路爲雲南府置都指揮使司命都督僉事馮誠署司事二月詔諭雲南諸郡蠻十五年友德等分兵攻諸蠻寨之未服者土官楊苴乘隙作亂集蠻衆二十餘萬攻雲南城時城中食少士卒多病寇至都督謝熊馮誠等攬城固守賊不能攻遂遠營爲久困計時沐英方駐師烏撒聞之將驍騎還救至曲靖遣卒潛入報城中爲賊所得給之曰總兵官領三十萬衆至矣賊衆驚愕拔營宵遁走安寧羅次邵甸富民普寧大理江川等處復據險樹柵謀再寇英分調將士勦降之斬首六萬餘級生禽四千餘人諸部悉定

二十六年英卒命其子春襲封西平侯仍鎮雲南自英平雲南在鎮十年恩威著於蠻徼每下片楮諸番部具威儀出郭叩迎盟而後啓曰此令旨也沐氏亦皆能以功名世其家每大征伐輒以征南將軍印授之沐氏未嘗不在行間數傳而西平裔孫當襲侯守臣爭之謂滇人知有黔國公不知西平侯也孝宗以爲然許之自是遂以公爵佩印爲故事諸土司之進止予奪皆咨稟及承平久文網周密凡事必與太監撫按三司會議後行動多掣肘土官子孫承襲有積至二三十年不得職者土官復慢令玩法無所忌憚待其罪大惡極然後興兵

征勦致軍民日困地方日壞大學士楊一清等因武定安銓之亂痛切陳之黔國公沐紹勲亦以爲言雖得旨允行亦不能更革馴至神宗之世朝廷情媿封疆敗壞日甚一日緬莽之叛皆土官之失職者導之雖稍奏膚功而滇南喪敗卒由土官沙定洲之禍沙定洲者王弄山長官司沙源之子也源驍勇有將材萬曆中數從征調有功巡撫委以王弄副長官事繼以征建水功以安南長官司廢地畀之後征東川水西馬龍山等處全雲南會城稱首功累加至宣撫使時號沙兵定洲其仲子也崇禎中元謀土知州吾必奎叛總兵官沐天波勦之

調定洲從征定洲不欲行出怨言會奸徒饒希之余錫
朋者逋天波金無以償錫朋常出入土司家誇黔府富
盛定洲心動陰結都司阮韻嘉諸人爲內應既定洲入
城辭行天波以家諱日不視事定洲譟而入焚劫其府
天波聞變由小竇遁時寧州土司祿永命在城方巷戰
拒賊從官周鼎止天波留討賊天波疑鼎爲定洲誘已
殺之其母妻皆走城北自焚死定洲據黔府盤踞會城
劫巡撫吳兆元使題請代天波鎮滇傳檄州縣全滇震
動祿永命與石屏州龍在田俱引所部去天波走楚雄
金滄副使楊畏知奉調駐城中謂天波曰公何不走永

昌使楚得爲備而公在彼犄角首尾牽制之上策也天波從之定洲至楚雄城閉不得入乃去遣其黨王翔李日芳等攻陷大理蒙化畏知乘間檄城外居民盡入城築陣濬隍調土漢兵守之定洲聞祿永命等各固守不敢至永昌恐懼知截其歸路急還兵攻楚雄畏知坐城樓賊發巨礮擊之煙焰籠城櫓衆謂畏知已死而畏知端坐自如賊相驚謂神畏知伺賊間輒出奇兵殺賊甚衆賊引去攻石屏不下還攻寧州祿永命戰死賊計迤東稍稍定乃復攻楚雄分兵爲七十二營環城掘濠爲久困計會張獻忠死其部將孫可望率餘衆由遵義入

黔稱黔國焦夫人弟來復仇民久困沙兵喜其來迎之
定洲解楚雄圍迎戰於草泥關大敗遁阿迷可望破曲
靖及交水俱屠之遂由陸涼宜良入雲南城分遣李定
國徇迤東諸府而可望自率兵西出畏知禦於啓明橋
兵敗被執可望聞其名不殺語之曰吾與爾共討賊何
如畏知要以三事不用獻忠僞號不殺百姓不擄婦女
吾從爾可望皆許之卽折箭相誓乃以書諭天波如畏
知言天波亦來歸而李定國之徇臨安者定洲部目李
阿楚拒戰甚力定國穴地置礮礮發城陷遂入驅城中
官民於城外白場殺之凡七萬八千餘人斬獲不與焉

當時皆意定國破臨安必襲阿迷取定洲乃僅掠臨安
子女而回所過無不屠滅迤西以畏知在軍得保全始
定洲歸屯兵洱革龍且借安南援自固會可望與定國
不協聲其罪杖之百責以取定洲自贖定國既至定洲
土目楊嘉方迎定洲就其營宴定國偵知之率兵圍營
相拒數日乃出降遂械定洲及妻萬氏數百人回雲南
剝其皮市中可望遂據滇而天波卒走死於緬甸

大理唐葉榆縣境也麟德初置姚州都督府開元末蒙
詔皮羅閣建都於此爲南詔治太和城至閣羅鳳號大
蒙國異牟尋改大禮國其後鄭買賜趙善政楊干貞互

篡奪至五代晉時段思平得之更號大理國元憲宗取雲南至大理段智興降附乃設都元帥封智興爲摩訶羅嵯管領八方又以劉時中爲宣撫使同智興安輯其民段氏有大理傳十世至寶聞太祖開基江南遣其叔段真由會川奉表歸款洪武十四年征南將軍傅友德克雲南授段明爲宣慰使明遣都使張元亨貽征南將軍書曰大理乃唐交綏之外國鄯闡實宋斧畫之餘邦難列營屯徒勞兵甲請依唐宋故事寬我蒙段奉正朔佩華篆比年一小貢三年一大貢友德怒辱其使明再貽書曰漢武習戰僅置益州元祖親征祗緣鄯闡乞賜

班師友德答書曰大明龍飛淮甸混一區宇陋漢唐之
小智卑宋元之淺圖大兵所至神龍助陣天地應符汝
段氏接武蒙氏運已絕於元代寬延至今我師已殲梁
王報汝世仇不降何待十五年征南左將軍藍玉右將
軍沐英率師攻大理大理城倚點蒼山西臨洱河爲固
聞王師至聚衆扼下關下關者南詔皮羅閣所築龍尾
關也號極險玉等至品甸遣定遠侯王弼以兵由洱水
東趨上關爲犄角勢自率衆抵下關造攻具遣都督胡
海洋由石門間道夜渡河繞出點蒼山後攀木援崖而
上立旗幟昧爽軍抵下關者望見皆踴躍謹譟蠻衆驚

亂英身先士卒策馬渡河水沒馬腹將士隨之遂斬關
入蠻兵潰拔其城酋長段世就禽世與明皆段寶子也
至京師帝傳諭曰爾父寶曾有降表朕不忍廢賜長子
名歸仁授永昌衛鎮撫次子名歸義授雁門鎮撫大理
悉定因改大理路爲大理府置衛設指揮使司十六年
品甸土酋杜惠來朝命爲千夫長命六安侯王志安慶
侯仇成鳳翔侯張龍督兵往雲南品甸繕城池立屯堡
置郵傳安輯人民十七年以土官阿這爲鄧川知州阿
散爲太和府正千夫長李朱爲副千夫長楊奴爲雲南
縣丞十九年置雲南洱海衛指揮使司以賴鎮爲指揮

僉事洱海本品甸也兵燹後人民流亡室廬無復存者
鎮至復城池建譙樓治廬舍市里修屯堡隄防斥埃又
開白鹽井民始安輯二十年詔景川侯曹震及四川都
司選精兵二萬五千人給軍器農具卽雲南品甸屯種
以俟征討永樂以後雲南諸土官州縣率按期入貢進
馬及方物朝廷賜予如制嘉靖元年改十二關長官司
於一泡江之西從巡撫何孟春奏也

臨安古句町國漢置縣唐爲羈摩牂州地天寶末南詔
蒙氏於此置通海郡元時內附置阿僰部萬戶府至元
中改臨安路屬臨安廣西元江等處宣慰司洪武十四

年征南將軍下雲南遣宣德侯金朝興分道取臨安元
右丞元卜台元帥完者都及土官楊政降改路爲府廢
宣慰司置臨安衛指揮使司十七年以土官和寧爲阿
迷知州弄甥爲寧州知州陸羨爲蒙自知縣普少爲納
婁茶甸副長官俱來朝貢因給誥敕冠帶以命之十八
年臨安府千戶納速丁等來朝人賜米十石永樂九年
溪處甸長官司副長官自恩來朝貢馬及金銀器賜賚
如例自恩因言本司歲納海肥七萬九千八百索非土
所產乞准鈔銀爲便戶部以洪武中定額難准折輸帝
曰取有於無適以厲民况彼遠夷尤當寬恤其除之宜

德五年中官雲仙還自雲南奏設東山口巡檢司以故土官後普覺爲巡檢八年虧容甸長官司奏河底自洪武中官置渡船路通車里八百近年軍民有逃逸出境詐稱使者迫令乘載往往被害又沿河時有劫盜出沒乞置巡檢司以故把事袁凱之子瑀爲巡檢從之嘉靖元年復設寧州流官知州掌州事土知州祿氏專職巡捕寧州舊設流官正德初土官祿俸陰賄劉瑾罷之遂交通彌勒州十八寨強賊爲亂爲官軍捕誅其子祿世爵復以罪論死撫按請仍設流官從之初臨安阿迷州土官普柱洪武中爲土知州後設流錄其後覺爲東山

巡檢旣而以他事廢正德二年以廣西維摩王弄山與
阿迷接壤盜出沒仍令普覺後納繼前職普維藩者與
寧州祿氏構兵師殲焉維藩子名聲幼育於官旣長有
司俾繼父職名聲收拾舊部勇於攻戰從討奢安有功
仍授土知州漸驕恣崇禎五年御史趙洪範按部名聲
不出迎已出戈甲旗幟列數里洪範大怒謀之巡撫王
伉請討得旨官軍進圍州城名聲恐使人約降而陰以
重賄求援於元謀土官吾必奎時官軍已調必奎隨征
必奎與名聲戰兵始合佯敗走官軍望見遂大潰布政
使周士昌戰死朝廷以起釁罪伉逮治而名聲就撫然

驕恣益甚當事者頗以爲患已而廣西知府張繼孟道出阿迷以計毒殺之必奎聞名聲死遂反連陷武定祿豐楚雄諸城寧州土官祿永命石屏州土目龍在田俱與必奎名聲從征著名至是黔國公沐天波檄之統兵合勦禽必奎名聲妻萬氏本江西寄籍女淫而狡名聲死後改嫁王弄山副長官沙源之子定洲名聲有子曰服遠與萬氏分寨居定洲誘殺服遠併其地天波檄定洲取必奎定洲不欲行遂反詳前傳臨安領州四縣四其長官司有九曰納樓茶甸曰教化三部曰溪處甸曰左能寨曰王弄山曰虧容甸曰思陀甸曰落恐甸曰安

南其地皆在郡東南西平侯征安南取道於此蓮花灘之外卽交荒外而臨安無南面之虞者以諸甸爲之備也但地多瘴流官不欲入諸長官亦不請代襲自相冠帶日尋干戈納樓部內有礦場三曰中場鶯黃摩訶封閉已久亡命多竊取之其安南長官司本阿剌蠻所居舊名褒古後名捨資元爲捨資千戶所以地近交趾改安南屬臨安路正德八年蒙自土舍祿祥爭襲父職鳩殺其嫡兄祿仁安南長官司土舍那代助之以兵遂稱亂守臣討平之事聞命革蒙自土官改長官司爲新安守禦千戶所調臨安衛中所官軍戍之

楚雄昔爲威楚元憲宗置威楚萬戶府至元後置威楚
開南路宣撫司洪武十五年南雄侯趙庸取其地十七
年以土官高政爲楚雄府同知阿魯爲定邊縣丞永樂
元年楚雄府言所屬蠻民不知禮義惟焚種賦性溫良
有讀書識字者府州已嘗設學教養其縣學未設縣所
轄六里蠻人過半請立學置官訓誨從之宣德五年命
故土知府高政女襲同知政初爲同知永樂中來朝時
仁宗監國嘉其勤誠陞知府子孫仍襲同知政卒無子
妻襲又卒其女奏乞襲知府帝曰皇考有成命令襲同
知八年陞南安州琅井土巡檢李保爲州判官以鄉老

言本州俱羅舞和泥烏蠻雜類稟性頑獷以無土官管束多致流移差役賦稅俱難理辦衆嘗推保署州事撫綏得宜民皆向服流移復歸乞授本州土官吏部言南安舊無土官難從其請帝以爲治在順民情從之九年黔國公沐晟等奏楚雄所屬黑石江及泥坎村銀場軍民盜礦千百爲羣執兵攘奪楚雄縣賊首者些糾合武定賊者惟等劫掠軍民殺巡檢張禎又定邊縣阿苴里諸處強賊聚衆抄掠景東等衛大理蒙化楚雄姚州皆有盜出沒帝敕責晟等期以三年討靖諸爲亂者嘉靖四十二年楚雄叛蠻阿方等兵起先攻易門所流劫嶠

甲辰卷三十三 五傳 十一
峨昆陽新化各州縣僭稱王約土官王一心王行道爲
援一心後悔詣軍門請討賊自効巡撫呂光洵許之招
降數百人官軍分道進禽獲賊黨乘勝攻大小木址二
寨克之斬阿方首餘賊悉平

澈江唐爲南寧昆二州地天寶末沒於蠻號羅伽甸宋
時大理段氏號羅伽部元置羅伽萬戶府至元中改澈
江路洪武十五年雲南平澈江歸附改澈江府地居滇
省之中山川明秀蠶衣耕食民安於業近郡之獯獯性
雖頑狠然恭敬上官官至爭迎到家刲羊擊豕罄所有
以供之婦女皆出羅拜故於諸府獨號安靜云

景東古柘南也漢尚未有其地唐南詔蒙氏始置銀生府後爲金齒白蠻所據元中統三年討平之以所部隸威楚萬戶至元中置開南州洪武十五年平雲南景東先歸附土官俄陶獻馬百六十匹銀三千一百兩馴象二詔置景東府以俄陶知府事賜以文綺襲衣十八年百夷思倫發叛率衆十餘萬攻景東之北吉寨俄陶率衆禦之爲所敗率其民千餘家避於大理府之白崖川事聞帝嘉其忠遣通政司經歷楊大用齎白金文綺賜之二十三年沐英討平思倫發復景東地因奏景東百夷要衝宜置衛以錦衣衛僉事胡常守之俄陶仍舊職

二十四年帝以景東爲雲南要害且多腴田調白崖川軍士屯守二十六年命洱海衛指揮同知賴鎮守景東從沐春請也宣德五年置孟緬長官司時景東奏所轄孟緬孟梳地方遐遠屢被外寇侵擾乞并孟梳於孟緬設長官司授把事姜嵩爲長官以隸景東歲增貢銀五十兩六年大侯土知州刀奉漢侵據孟緬地敕黔國公沐晟遣官撫諭正統中思任發叛官軍征麓川知府陶瓚從征有功進階大中大夫弘治十五年正月景東衛雲霧黑暗晝夜不別者凡七日巡撫陳金以聞命廷臣議考察以謝天變南京刑部都察院承旨考黜文武官

千二百員嘉靖中者東甸稱亂劫景東府印去土舍陶金追斬其頭目奪印歸景東部皆焚種性淳樸習弩射以象戰歷討鐵索米魯那鑑安銓鳳繼祖諸役皆調其兵及戰象天啓六年貴州水西安邦彥反率衆二十萬入滇境至馬龍後山去會城十五里總兵官調景東土舍陶明卿率兵伏路左賊分道并至官兵禦之賊拒戰勢甚銳明卿乃以象陣從左翼衝出橫擊賊潰追奔十餘里巡撫上功推明卿第一景東每調兵二千必自効千餘餉士之費未嘗仰給公家土司中最稱恭順其府治東有邦泰山頗險峻土官陶姓所世居也

廣南宋時名特磨道士酋儂姓智高之裔也元至元間立廣南西道宣撫司初領路城等五州後惟領安寧富二州洪武十七年歸附改廣南府以土官儂郎金爲同知十八年郎金來朝賜錦綺鈔錠二十八年都指揮同知王俊奉命率雲南後衛官軍至廣南築城建衛郎金父貞佑不自安結衆據山寨拒守俊遣人招之不服時伏草莽中劫掠覘官軍進退俊乃遣指揮歐慶等分兵攻各寨自將取貞佑又以兵扼間道絕其救援諸寨悉破衆潰貞佑窮促就禽械送京師降郎金爲府通判永樂六年富州土知州沈絃經入貢值仁孝皇后喪絃經

奉香幣致祭宣德元年上官儂郎舉來朝貢馬正統六年廣南賊阿羅阿思等劫掠命總兵官沐昂等招撫之時富州土官沈政與郎舉互訐糾衆侵地帝命昂等勘處七年昂奏二人叛逆無實迹因有隙相妄奏兵部請治政等罪帝以蠻人宥之政舉相讐殺已十餘年時方征麓川憚兵威不敢動未幾郎舉以從征功陞同知死無嗣四門舍目共推儂文舉署事屢立戰功萬曆七年實授同知子應祖從征三鄉親獲賊首詔賞銀百兩播州之役徵其兵三千討尋甸叛目皆有功賜四品服儂氏自文舉藉四門舍目推擁之力得授職後儂氏襲替

必因之土官之政出於四門租稅僅取十之一道險多瘴知府不至其地印以臨安指揮一人署之指揮出印封一室入取必有瘟癘死亡萬曆末知府廖鉉者避瘴臨安以印付同知儂仕英子添壽添壽死家奴竊印井經歷司印以逃旣而歸印於其族叔儂仕祥時仕英親弟仕獬例得襲索仕祥印仕祥不與遂獻地與泗城土官岑接與連婚構兵滅仕獬家及仕祥死子琳以府印送接而經歷司印又爲琳弟瓊所有巡撫王懋中調兵往問瓊懼還印於通判周憲接亦出府印獻於官時兵方調至境遽遣歸廷議治鉉擅離與守巡失撫之罪瓊

接已輸服勿問詔可未幾儂紹湯兄弟爭襲各糾交趾
兵象焚掠一空

廣西隋屬牂州後爲東爇烏蠻等部所居唐隸黔州都
督府後師宗彌勒二部浸盛蒙段皆莫能制元憲宗時
始內屬至元十二年籍二部爲軍置廣西路洪武十四
年歸附以土官普德署府事二十年普德及彌勒知州
赤善師宗知州阿的各遣人貢馬詔賜文綺鈔錠二十
四年布政使張統奏維摩雲龍永寧浪渠越順等州縣
蠻民頑惡不遵政教宜置兵戍守以控制之是後朝貢
賜予如制正統六年總兵官沐昂奏師宗州及廣南府

賊阿羅阿思糾合爲亂命昂等招諭未幾平成化中土
知府昂貴有罪革其職安置彌勒州乃置流官始築土
城嘉靖元年設雲南彌勒州十八寨守禦千戶所其部
衆好擄掠無紀律至水西烏撒用兵始征調之崇禎間
巡按御史傅宗龍由滇入黔招普兵以行時滇中最勅
稱沙普兵亦曰昂兵

鎮沅古濮洛雜蠻所居元史謂是和泥昔樸二蠻也唐
南詔蒙氏銀生府地其後金齒爨蠻據之元時爲威遠
蠻棚府屬元江路總管洪武十五年總管刀平與兄那
直歸附授千夫長建文四年置鎮沅州以刀平爲知州

永樂三年刀平率其子來朝貢方物賜鈔文綺從征八百又從攻石崖者達寨外部整線來降入貢方物陞爲府以刀平爲知府置經歷知事各一員貢賜皆如例成化十七年以地方未平免鎮沅諸土官朝覲正統元年復免嘉靖中征安銓調鎮沅兵千人命刀寧息領之復調其子刀仁亦率兵千人征那鑑克魚復寨初鎮沅印爲那氏所奪至是得印以獻命給之領長官司一曰祿谷寨永樂十年置

永寧昔樓頭睽地接吐蕃又名荅藍唐屬南詔後爲麼些蠻所據元憲宗時內附至元間置荅藍管民官尋改

永寧州隸北勝府洪武平雲南時屬鶴慶府二十九年
改屬瀾滄衛十二月土賊卜百如加劫殺軍民前軍都
督僉事何福遣指揮李榮等討之其子阿沙遁入革失
瓦都寨官軍齎三日糧深入追之會天大雨衆饑疲引
還永樂四年設四長官司隸永寧土官以土酋張首等
爲長官各給印章賜冠帶綵幣尋陞永寧爲府隸布政
司陞土知州各吉八合知府遣之齎敕往大西番撫諭
蠻衆宣德四年永寧蠻寨矢不刺非糾四川鹽井衛土
官馬刺非殺各吉八合官軍撫定之命卜撒襲知府復
爲矢不刺非所殺已命卜撒之弟南八襲馬刺非又據

永寧節卜上下三村逐南八大掠夜白尖住促卜瓦諸寨事聞帝命都督同知沐昂勒兵諭以禍福并移檄四川行都司下鹽井衛諭馬刺非還所據村寨正統二年馬刺非爲南八所攻拔烏節等寨南八亦言馬刺非殺害詔鎮巡官驗問令各歸侵地乃寢永寧界東至四川鹽井衛十五里西至麗江寶山州南至浪渠州北至西番領長官司四曰刺次和曰魯瓦之曰革甸曰香羅順寧府本蒲蠻地名慶甸宋以前不通中國雖蒙氏段氏不能制元泰定間始內附天曆初置順寧府并慶甸縣後省入府洪武十五年順寧歸附以土酋阿悅貢署

府事十七年命阿日貢爲順寧知府二十三年土酋猛邱土知府子邱等不輸徵賦自相仇殺大理衛指揮鄭祥征蒙化賊移師至甸頭破其寨猛邱請降輸賦乃還猛邱死把事阿羅等復起兵相攻擊二十九年西平侯沐春遣鄭祥與指揮李榮等分道進討禽阿羅等誅之後貢賜如制順寧與大侯接境宣德中大侯土舍奉赦奉學兄弟不相能奉學倚妻父土知府猛廷瑞與兄赦日構兵巡撫陳用賓檄參將李先著副使邵以仁勘處以仁襲執廷瑞因請改順寧爲流官先著被檄極言不可討被謗語逮下獄瘐死然廷瑞實無反謀以參將吳

顯忠覘其富誣以助惡索金不應遂讒於巡按張應揚
轉告巡撫陳用賓廷瑞大恐不得已斬奉學以獻顯忠
益誣其陰事傳以反狀撫按會奏得旨大勦廷瑞出獻
印獻子以候命不從顯忠帥兵入其寨盡取猛氏十八
代蓄貲數百萬誘廷瑞至會城執之獻捷於朝於是所
部十三寨盡憤始聚兵反官兵悉勦除之并殺其子以
仁超擢右都御史廕子未幾坐大辟繫獄應揚亦病卒
人以爲天道云順寧附境有猛猛猛撒猛猛緬所謂三緬
也猛猛最强部落萬人時與二猛爲難其地田少菁多
射獵爲業猛緬地雖廣而人柔弱部長賜冠帶最忠順

猛撒微弱後折入於耿馬云

蒙化唐屬姚州都督府蒙氏時細奴邏築城居之號蒙舍詔段氏改開南縣元爲州屬大理洪武十七年以土酋左禾爲蒙化州判官施生爲正千夫長二十三年西平侯沐英以蒙化所屬蠻火頭字青等梗化不服請置衛命指揮僉事李聚守蒙化賊高天惠作亂大理衛指揮使鄭祥捕斬之傳首雲南永樂九年土知州左禾正千夫長阿東來朝貢馬賜予如例旣左伽從征麓川戰於大侯功第一進秩臨安知府掌州事正統中陞州爲府以左伽爲知府世襲所部江內諸蠻性柔頗馴擾江

外數枝以勇悍稱每應征調多野戰無行伍成化十七年巡撫奏地方未寧免蒙化土官明年朝貢正統元年詔復免萬曆四十八年雲龍土知州段龍死子嘉龍立養子進忠殺嘉龍爭襲流劫殺掠官軍進討進忠從間道欲趨大理官軍禽誅之改設流官授段氏世吏目一人

孟艮蠻名孟指自古不通中國永樂三年來歸設孟艮府隸雲南都司以土酋刀哀爲知府給印誥冠帶時刀哀遣人來朝請設治所歲辦差發黃金六十兩六年土知府刀交遣弟刀哈哄貢象及金銀器禮部言刀交嘗

構兵攻劫鄰境詐譎不誠宜却其貢帝曰蠻夷能悔過
來朝往事不足責命賜鈔及絨錦綺帛是後貢賜皆如
例宣德六年命內官楊琳齎幣往賜孟艮知府刀光
正統間孟艮地多爲木邦所并景泰中入貢知府名慶
馬辣不知於刀氏何屬也孟艮在姚關東南二千里外
沃野千里最殷富地多虎農者於樹杪結草樓以護稼
雲南知府趙混一嘗入其境待之禮慢後無復至者
孟定蠻名景麻至元中立孟定路軍民總管府領二甸
隸大理金齒等處宣慰司洪武三十五年土酋刀名扛
來朝貢方物賜綺帛鈔幣設孟定府以刀渾立爲知府

永樂二年孟定土官刀景發遣人貢馬賜鈔羅綺遣使
往賜印誥冠帶襲衣復頒信符金字紅牌四年帝以孟
定道里險遠每歲朝貢不便令自今三年一貢如慶賀
謝恩不拘例初孟璉與孟定皆麓川地其土目皆故等
夷惡相屬後改孟璉隸雲南多以互侵土地仇殺宣德
六年土知府罕顏法以爲言敕黔國公沐晟遣官撫諭
俾各歸侵掠正統中麓川叛孟定知府刀祿孟遁走木
邦土官罕葛從征有功總督王驥奏令食孟定之土嘉
靖間木邦罕烈據地奪印令土舍罕慶守之名爲耿馬
地之所入悉歸木邦萬曆十二年官兵取隴川平孟定

故地以罕葛之後爲知府十五年頒孟定府印崇禎末
孟定叛降於緬甸其地自姚關南八日程西接隴川東
連孟璉南木邦北鎮康土瘠人稀有馬援城在焉領安
撫司一曰耿馬萬曆十二年置以們罕爲安撫使與孟
定隔喳哩江孟定居南耿馬居北罕死弟們罕金護印
屢奉朝貢時木邦思禮作亂侵灣甸鎮康倚罕金爲聲
援天啟二年緬人攻猛乃孟艮罕金欲救之緬移兵攻
金金厚賂之乃解後與木邦罕正構難不絕云

曲靖隋恭協二州地唐置南寧州改恭州爲曲州分協
州置靖州至元初置磨彌部萬戶後改爲曲靖路宣慰

司洪武十四年征南將軍下雲南元曲靖宣慰司征行
元帥張麟行省平章劉輝等來降十五年改曲靖千戶
所爲曲靖軍民指揮使司置曲靖軍民府十六年霑益
州土官安索叔安磁等貢馬及獬邏刀甲氊衫虎皮詔
賜磁冠帶綺羅衣各一襲并文綺鈔錠羅雄州土酋納
居來朝賜鈔幣十七年亦佐縣土酋安伯作亂西平侯
沐英發兵討降之二十年越州土酋阿資與羅雄州營
長發束等叛阿資者土官龍海子也越州蠻呼爲苦麻
部元末龍海居之所屬俱囉囉斯種王師征南時英駐
兵其地之湯池山龍海降遂遣子入朝詔以龍海爲知

州尋爲亂英禽之徙遼東至蓋州病死阿資繼其職益桀驁至是叛帝命英會征南將軍傅友德進討道過平夷以其山險惡宜駐兵屯守遂遷其山民往居卑午村留神策衛千戶劉成等將千人置堡其地後以爲平夷千戶所阿資等率衆寇普安燒府治大肆剽掠友德率兵擊之斬其營長二十二年友德等進攻土官普旦來降阿資退屯普安倚崖壁爲寨友德以精兵蹙之蠻衆皆緣壁攀崖墜死者不可勝數生禽一千三百餘人獲馬畜甚衆阿資遁還越州復追擊敗之斬其黨五十餘人阿資窮蹙請降初阿資之遁也揚言曰國家有萬軍

之勇我地有萬山之險豈能盡滅我輩英乃請置越州
龍馬二衛扼其險要復分兵追捕至是遂降英等以陸
涼西南要地請設衛屯守命洱海衛指揮僉事滕聚於
古魯昌築城置陸涼衛指揮使司英又言曲靖指揮千
戶哈刺不花乃故元守禦陸涼千戶今陸涼置衛宜調
於本衛鎮守庶絕後患詔從之帝以平夷尤當要衝四
面皆諸蠻部落乃遣開國公常昇往辰陽集民間丁壯
五千人統以右軍都督僉事王成卽平夷千戶所改置
衛二十三年置越州衛二十四年徙越州衛於陸涼州
以英言雲南諸蠻皆降惟阿資恃險屢叛宜徙衛軍守

禦已阿資復叛命都督僉事何福爲平羌將軍率師進討屢敗賊衆會連月淫雨水溢阿資援絕與其衆降福擇曠地列柵以置其衆西南有木蓉菁賊常出沒處復調普安衛官軍置寧越堡鎮之然阿資終不悛二十七年阿資復反西平侯沐春及福率兵營於越州城北遣壯士伏於岐路而以兵挑戰蠻兵悉衆出伏起大敗之阿資脫身遁初曲靖土軍千戶阿保張琳所守地與越州接壤部衆多相與貿易春使人結阿保等覘阿資所在及其經行地星列守堡絕其糧道賊益困二十八年福潛引兵屯赤窩舖遣百戶張忠等擣賊巢禽阿資斬

之俘其黨越州乃平自是以後諸土官按期朝貢西南
晏然正統二年曲靖軍民知府晏毅言四事一土官承
襲或子孫或兄弟或妻繼夫或妾繼嫡皆無豫定次序
致臨襲爭奪仇殺連年乞敕該部移文所司豫爲定序
造冊土官有故如序襲職一請卹陣亡子孫一請雲南
官俸悉如四川之例一均戶口田地事下所司議行毅
復請設霑益州松韶巡檢從之嘉靖中羅雄知州者濬
殺營長奪其妻生子繼榮稍長卽持刀逐濬濬欲置之
死以其母故不忍及濬請老以繼榮代襲繼榮遂逐濬
濬訴之鎮巡官命迎濬歸繼榮陽事之實加禁錮萬曆

九年調羅雄兵征緬繼榮將行恐留濬爲難遂弑濬時
霑益土知州安世鼎死妻安索儀署州事亦提兵赴調
繼榮與之合營通焉且倚霑益兵力爲助師過越州留
土官資氏家淫樂不進知州越應奎白於兵備將禽之
繼榮走遂聚衆反攻破陸涼鴨子塘陡陂諸寨築石城
於赤龍山據龍潭爲險廣六十里名己所居曰龍樓鳳
閣環以羣寨實諸軍士妻女其中十三年巡撫劉世曾
乃檄諸道進兵適劉綎破緬解官回世曾以兵屬綎綎
遂馳赴普鮐營直擣赤龍寨斬賊渠帥繼榮遁去綎復
連破三寨降其衆一萬七千人追奔至阿拜江斬繼榮

賊平世曾請築城改設流官乃以何倓爲知州者繼仁爲巡檢未幾蠻寇必大反殺繼仁執倓參將蔡兆吉等討定之乃改羅雄州曰羅平設千戶所曰定雄時霑益安素儀無子以烏撒土官子安紹慶爲嗣慶死孫安遠襲土婦設科作亂逐安遠糾衆焚掠霑益諸堡站陷平夷衛天啓三年官兵禽設科誅之五年安邊據霑益從水西叛事詳烏撒傳中初越州阿資罪誅永樂間以其子祿寧爲土縣丞與亦佐沙氏分土而居其地南北一百二十里土馬精強征調銀至三千八百兩曲靖境內有交水去平夷衛二舍與黔接壤滇師出上六衛必由

明史卷三百十三
列傳三
之道天啟初水西用兵撫臣議曲靖鎖鑰全滇交水當
黔滇之衝乃阨塞要地平夷右所宜移置交水去險築
城俾與平夷衛相望互爲聲援便報可

明史卷三百十三終

明史卷三百十四

列傳第二百二

總裁官總理事務經筵講官少保兼太子太保保和殿大學士兼詹事府詹事加六級張廷奎奉

敕修

雲南土司二

姚安

鶴慶

武定

尋甸

麗江

元江

永昌

新化

威遠

北勝

灣甸

鎮康

大侯

瀾滄衛

麓川

姚安本漢弄棟蜻蛉二縣地唐置姚州都督府以民多姚姓也天寶間南詔蒙氏改爲弄棟府宋時段氏改姚州元立統矢千戶所天曆間陞姚安路洪武十五年定雲南改爲府十六年姚安土官自久作亂官兵往討師次九十九莊自久遁去明年復寇品甸西平侯沐英奏以土官高保爲姚安府同知高惠爲姚安州同知保惠從英擊自久平之二十年命普定侯陳桓靖寧侯葉昇往雲南總制諸軍於定邊姚安等處立營屯種二十六

年保以襲職遣其弟貢馬謝恩宣德九年姚安土知府高賢遣使貢馬弘治中土官高棟與普安叛賊戰死於板橋驛嘉靖三十年土官高鵠當元江之變布政司徐樾遇害奮身赴救死之萬曆中同知高金以征緬功賜四品服所屬大姚縣有鐵索箐者本猺種依山險以剽掠爲業旁郡皆受其害弘治間稍有歸命者分隸於姚安姚州嘉靖中乃專屬姚安其渠羅思者有幻術造僞印稱亂萬曆元年巡撫鄒應龍與總兵官沐昌祚討平之諸郡乃安

鶴慶唐時名鶴川南詔置謀統郡元初置鶴州至元中

陞鶴慶府尋改爲路洪武中大軍平雲南分兵拔三營萬戶砦獲僞參政寶山帖木兒等六十七人置鶴慶府以土官高隆署府事十七年以董賜爲知府高仲爲同知賜子節爲安寧知州楊奴爲劍川知州賜率其屬來朝貢馬及方物詔賜冠帶并織金文綺布帛鈔錠十八年以賜爲雲南前衛世襲指揮僉事賜安寧州人世爲酋長大軍入滇率衆來降復從軍討賊有功故與子節竝有世襲知府知州之命及賜來朝以父子俱受顯榮無以仰報子幼冲不達政治乞還父子所授官而自爲安寧知州帝曰爾能綏靖邊鄙授爾官以酬爾勲今辭

尊居卑奈何命潁國公傅友德及諸大臣議之皆以賜
既有功不可聽其辭而節之官則可免乃改賜明威將
軍雲南前衛世襲指揮僉事諭曰雲南前衛密邇安寧
特命爾是職爾其綏輯遠人以安邊鄙其毋再辭二十
年劍川土官楊奴叛大理衛指揮鄭祥討之斬八十餘
人楊奴遁未幾還劍川復聚蠻爲亂祥復以兵擊斬之
二十四年置鶴慶衛三十年改鶴慶府爲軍民府永樂
十五年順州知州王義言霑被聖化三十餘年聲教所
屆言語漸通子弟亦有俊秀請建學教育從之正統二
年副使徐訓奏鶴慶土知府高倫與弟純屢逞兇惡屠

戮士庶與母楊氏并叔宣互相賊害敕黔國公沐昂諭使輸款如恃強不服卽調軍禽捕五年復敕昂等曰比聞土知府高倫妻劉氏同倫弟高昌等糾集囉囉麼些人衆肆行兇暴事發不從逮訊敕至卽委官至彼勘實量調官軍禽捕首惡并逮千戶王蕙及高宣等至京質問八年鶴慶民楊仕潔妻阿夜珠告倫謀殺其子復命法司移文勘驗已而大理衛千戶奏報倫擅率軍馬欲謀害親母又稱其母告倫不孝及私歛民財多造兵器殺戮軍民支解梟令等罪遂敕黔國公沐晟等勘覆及奏至言倫所犯皆實罪應死倫復屢訴因與叔宣爭襲

又與千戶王蕙爭娶妾以致挾仇誣陷所勘殺死皆病死及強盜拒捕之人倫母楊亦訴倫無不孝實由宣等陷害復敕晟及御史嚴恭確訪旣而奏當倫等皆伏誅高氏族人無可繼者帝命於流官中擇人以綏遠蠻乃擢瀘州知府林適節爲知府鶴慶之改流官自此始

武定南詔三十七部之一宋淳熙間大理段氏以阿歷爲羅武部長三傳至矣格當元世祖時爲北部土官總管至元七年改武定路置南甸縣洪武十四年雲南下武定女土官商勝首先歸附十五年改爲武定軍民府以勝署府事十六年勝遣人來朝貢馬詔賜勝誥命朝

服及錦幣鈔錠十七年以和曲土官豆派爲知州二十一年發內帑令於武定德昌會川諸處市馬三千匹宣德元年元謀縣故土知縣吾忠子政來朝正德二年四月武定雨雹溪水漲決堤壞田隕霜露殺麥七月廢武定所屬之南甸縣改隸和曲州石舊縣改隸祿勸州三年土知府鳳英以從征功進秩右參政仍知府事請賜金帶部議不可帝以英有軍功給之明年英貢馬謝恩賜如例嘉靖七年土舍鳳朝文作亂殺同知以下官吏刼州印舉兵與尋甸賊安銓合犯雲南府撫臣以聞時安銓未平朝文復起滇中大擾詔以右都御史伍文定

爲兵部尚書提督雲貴川湖軍務調四鎮土漢官軍討賊五月黔國公沐勛疏言臣奉命會同巡撫等調發官軍分道勦撫諸賊抗逆執留所遣官軍二人所調集各土舍又重自疑畏臣謹以便宜榜示先給冠帶待後奏請承襲衆始感奮於二月進兵擊斬強賊十餘人賊奔回武定乞敕部授臣方略俾獲便宜行事并宥各土舍往罪凡有功者俱許承襲作其敵愾之氣帝納之賜敕獎勵賊旣敗歸其黨稍散初朝文給其衆謂武定知府鳳詔母子已戮朝廷且盡勦武定蠻衆至是鳳詔同其母率衆自會城往蠻民相顧錯愕咸投鳳詔降朝文計

無所出絕普渡而走官兵追及復敗之朝文率家奴數人取道霑益州奔至東川之湯郎箐爲追兵所及磔死銓衆猶盛遁據尋甸故巢列寨數十官兵分哨夾攻之諸寨先後破乃併力攻拔其必古老巢銓奔東川入芒部爲土舍祿慶所執賊平是役也生禽渠賊千餘人斬首二千九百餘級俘獲男婦千二百餘撫散蠻黨二萬有奇奪器械牛馬無算捷聞銓朝文皆梟示籍其產家屬戍邊十六年命土知府瞿氏掌印初府印自洪武以來俱掌於土官正德間有司議以畀流官同知土知府職專巡捕徵糧而已及鳳詔死瞿氏以母襲子官所轄

四十七馬頭阿台等數請以印屬瞿氏吏部覆言係舊例宜如其請從之四十二年瞿氏老舉鳳詔妻索林自代比索林襲遂失事姑禮瞿氏大恚乃收異姓兒繼祖入鳳氏宗挾其甥壻貴州水西土舍安國亨四川建昌土官鳳氏兵力欲廢索林以繼祖嗣不克乃具疏自稱爲索林囚禁令繼祖詣闕告之繼祖歸詐稱受朝命襲職驅目兵逼奪府印索林抱印奔會城撫按官諭解之索林歸武定視事如故而復聽繼祖留瞿氏所於是婦姑嫌隙益甚索林謀誅繼祖事洩繼祖遂大發兵圍府行劫和曲祿勸等州縣殺傷調至土官王心一等兵索

林復抱印走雲南巡撫曹忭下令收印逮其左右鄭茲繫獄令瞿氏暫理府事貸繼祖責其自新四十四年添設府通判一員四十五年築武定新城成巡撫呂光洵遣鄭茲回府復業鄭茲者前爲索林謀殺繼祖者也繼祖執而殺之糾衆攻新城臨安通判胡文顯督百戶李鰲土舍王德隆往援至雞溪子隘遇伏鰲及德隆俱死僉事張澤督尋甸兵二千餘馳救亦敗澤及千戶劉裕被執鎮巡官促諸道兵竝進逼繼祖東山寨圍之繼祖懼攜澤及索林走照姑已復殺澤官軍追之急由直勒渡過江趨四川依東川婦家阿科等巡按劉思問以狀

聞敕雲南四川會兵討賊初繼祖之走東川也土官鳳氏與之通已而見滇蜀官軍與土舍祿紹先等兵皆會乃背繼祖發卒七千人來援繼祖益窮賊帥者色赴紹先營降斬繼祖以獻姚縣土官高繼先復禽其餘黨姚安府同知高欽及弟鈞謀主趙士傑等皆伏誅守臣議改設流官猶不欲絕鳳氏授索林支屬鳳曆子思堯經歷給莊百餘鳳曆以不得知府怨望陰結四川七州及水西宣慰安國亨謀作亂流官知府劉宗寅遣諭之不聽遂聚衆稱思堯知府夜襲府城城中嚴備不能入退屯魯墟宗寅夜出兵砍其營賊潰追至馬刺山禽鳳曆

明史紀事本末卷之十四 叛亂
伏誅萬曆三十五年繼祖姪阿克久徙金沙江外賊黨
鄭舉等誘阿克作亂陰結江外會川諸蠻直陷武定大
肆刼掠連破元謀羅次諸城索府印會流官知府攜印
會城不能得賊以無印難號召刼推官請冠帶印信鎮
撫以兵未集懼差人以府印授之賊退入武定立阿克
爲知府鎮撫調集土兵分五路進勦克復武定元謀羅
次祿豐嵩明等州縣禽阿克及其黨至京師磔於市武
定平遂悉置流官

尋甸古滇國地獍刺蠻居之號仲剗溢源部後爲烏蠻
裔斯丁所奪號斯丁部蒙氏爲尋甸至段氏改仁德部

元初置仁德萬戶後改府洪武十五年定雲南仁德土官阿孔等貢馬及方物改爲尋甸軍民府十六年土官安陽來朝貢馬及虎皮氊衫等物詔賜衣服錦綺鈔錠十七年以尋甸土官沙琛爲知府二十三年置木密關守禦千戶所於尋甸之甸頭易龍驛又置屯田所於甸頭里果馬里聯絡耕種以爲邊備是後土官皆按期入貢成化十二年兵部奏土官舍人安宣聚衆殺掠命鎮守官相機撫捕十四年土知府安晟死兄弟爭襲遂改置流官嘉靖六年安銓作亂乃土舍之失職者也侵掠嵩明木密楊林等處巡撫傳習檄守巡官討之大敗賊

遂陷尋甸嵩明殺指揮王昇唐功等知府馬性魯棄城走時武定鳳朝文叛銓與之合久之伏誅事詳前傳
麗江南詔蒙氏置麗水節度宋時麼些蠻蒙醋據之元初置茶罕章宣慰司至元中改置麗江路軍民總管府後改宣撫司洪武十五年置麗江府十六年蠻長木德來朝貢馬以木德爲知府羅克爲蘭州知州十八年巨津土酋阿奴聰叛劫石門關千戶浦泉戰死吉安侯陸仲亨率指揮李榮鄭祥討之賊戰敗遁入山谷捕獲誅之時木德從征又從西平侯沐英征景東定邊皆有功予世襲二十四年木德死子初當襲初守巨津州石門

關與西番接境旣襲職英請以初弟齡爲千夫長代守石門從之二十六年十月西平侯沐春奏麗江土民每歲輸白金七百六十兩皆麼些洞所產民以馬易金不諳真僞請令以馬代輸從之三十年改爲麗江軍民府從春請也永樂十六年檢校麗文郁言本府及寶山巨津通安蘭州四川歸化日久請建學校從之宣德五年麗江府奏浪滄江寨蠻者保等聚衆劫掠黔國公沐晟委官撫諭不服部議再行招撫已蘭州土官羅牙等奏者保拒命請發兵討之帝命黔國公及雲南三司相機行勿緣細故激變蠻民正統五年賜知府木森誥命加

授大中大夫資治少尹以征麓川功也成化十一年知府木欽奏鶴慶千夫長趙賢屢糾羣賊越境殺掠乞調旁衛官軍禽勦命移知守臣計畫嘉靖三十九年知府木高進助殿工銀二千八百兩詔加文職三品服色給誥命四十年又進木植銀二千八百兩詔進一級授亞中大夫給誥命萬曆三十一年巡按御史宋興祖奏稅使內監楊榮欲責麗江土官退地聽採竊以麗江自太祖令木氏世官守石門以絕西域守鐵橋以斷吐蕃滇南藉爲屏藩今使退地聽採必失遠蠻之心卽令聽諭已使國家歲歲有吐蕃之防倘或不聽豈獨有傷國體

疏上事得寢三十八年知府木增以征蠻軍興助餉銀二萬餘兩乞比北勝土舍高光裕例加級部覆賜三品服色巡按御史劾其違越請奪新恩從之四十七年增復輸銀一萬助遼餉泰昌元年錄增功賞白金表裏其子懿及舍目各賞銀幣有差天啟二年增以病告加授左參政致仕五年特給增誥命以旌其忠雲南諸土官知詩書好禮守義以麗江木氏爲首云

元江古西南夷極邊境曰惠籠甸又名因遠部南詔蒙氏以屬銀生節度徙白蠻蘇張周段等十姓戍之又開威遠等處置威遠睽後和泥侵據其地宋時儂智高之

黨竄居於此和泥又開羅槃甸居之後爲麼些徒蠻阿
僂諸部所據元時內附至元中置元江萬戶府後於威
遠更置元江路領羅槃馬籠等十二部屬臨安廣西元
江等處宣慰司洪武十五年改元江府十七年土官那
直來朝貢象以那直爲元江知府賜襲衣冠帶十八年
置因遠羅必甸長官司隸之以土酋白文玉爲副長官
二十年遣經歷楊大用往元江等府練兵時百夷屢爲
邊患帝欲發兵平之故也二十六年置元江府儒學二
十七年知府那榮及白文玉等來朝貢永樂三年榮復
入朝貢帝厚加賜予遂改爲元江軍民府給之印信榮

請躬率兵及餽運往攻八百帝嘉勞之元江府又奏石屏州洛夾橋每歲江水衝壞止令本府修理民不堪乞命石屏州協治從之九年那榮率頭目人等來朝貢馬及金銀器賜予如例十二年故土知府那直子那邦入貢方物宣德五年黔國公沐晟奏元江土知府那忠被賊刀正刀龍等焚其廨宇及經歷印信今獲刀龍刀治赴京乞如永樂故事發遼東安置以警邊夷從之命禮部鑄印給之正統元年因遠羅必甸長官司遣人來朝貢馬正德二年以那端襲土知府嘉靖二十五年土舍那鑑殺其姪土知府那憲奪其印并收因遠驛印記巡

撫應大猷以聞命鎮巡官發兵勦之二十九年那鑑懼密約交蠻武文淵謀亂撫按官胡奎林應箕總兵官沐朝弼以聞請以副使李維參政胡堯時督兵勦之制可那鑑益縱兵攻掠村寨沐朝弼與巡撫石簡調武定北勝亦佐等土漢兵分五哨調兵旣集朝弼與簡駐臨安分部進兵破木龍寨降甘莊賊勢漸蹙那鑑遣經歷張維及生儒數人詣南美監督王養浩所乞降時左布政徐樾以督餉至南美樾迂聞聞維言謂鑑誠計窮乃約翼日令鑑面縛出城來降左右咸謂夷詐不可信樾不聽如期親率百人往城下受降鑑縱象馬夷兵突出衝

之樾及左右皆死巡按趙炳然以聞并參朝弼簡及養
浩等失事罪帝降敕切責褫簡職養浩等各住俸剋期
捕賊贖罪朝弼與簡乃督集五哨兵環元江而壁令南
美哨督兵渡江攻城選路通哨甘莊哨各精卒二千佐
之那鑑知二哨精卒悉歸南美潛遣兵象乘虛衝路通
哨官兵不意賊至倉猝燒營走監督郝維嶽奔入甘莊
哨甘莊亦大潰督哨李維亦遁惟餘南美逼城而軍武
定女土官瞿氏寧州土舍祿紹先廣南儂兵頭目陸友
仁咸恨那鑑戕主奪嫡誓死不退督哨王養浩因激獎
之翼日鼓譟攻城賊大敗閉門不出官兵圍之鑑乞降

官兵懲徐樾之敗不應城中析屋而爨斗米銀三四錢時瘴毒起大兵乃復撤期秋末征之朝弼以事聞帝定二哨失事諸臣罪行撫臣厚賞瞿氏祿紹先陸友仁等敕朝弼會同新撫臣鮑象賢鳩兵討賊三十二年象賢至鎮調集土漢兵七萬人廣集糧運剋期分哨進剿元江爲必取計那鑑懼伏藥死象賢檄百戶汪輔入城撫諭其衆禽其賊首及戕土官那憲之阿捉殺布政徐樾之光龍光色等皆斬首以獻鑑子恕輸所占那旂封鑾等村寨并出所掠鎮沅府印納象十二隻輸屢歲逋賦象賢命官民推那氏當立者衆舉前土官那端從孫從

仁象賢疏言其狀請廢恕貸其死命從仁暫統其衆加
汪輔以千戶職從之萬曆十三年以元江土舍那恕招
降庫里功許襲祖職賞銀幣領長官司一曰因遠羅必
甸

永昌古哀牢國漢武帝時置不韋縣東漢置瀾滄郡尋
改永昌郡唐屬姚州後爲南詔蒙氏所據歷段氏高氏
皆爲永昌府元初於永昌立三千戶所隸大理萬戶所
至元間置永昌州尋爲府隸大理路置金齒等處宣撫
司治洪武十五年定雲南立金齒衛以元雲南右丞觀
音保爲金齒指揮使賜姓名李觀十六年永昌州土官

申保來朝詔賜錦二匹織金文綺二匹衣一襲及鍛花銀帶韉襪十七年以申保爲永昌府同知四月金齒土官段惠遣把事及其子弟來貢賜綺帛鈔有差置司甸長官司以土酋阿千爲副長官賜冠帶十八年置金齒衛指揮使司二十年遣使諭金齒衛指揮儲傑嚴武李觀曰金齒遠在邊徼土民不遵禮法爾指揮李觀處事寬厚名播蠻中爲諸蠻所愛然其下多恃功放恣有乖軍律故特命傑武輔之觀之寬可以綏遠傑武之嚴可以馭下敕至其整練諸軍以觀外變二十三年罷永昌府改金齒衛爲軍民指揮使司時西平侯沐英言永昌

居民鮮少宜以府衛合爲軍民使司從之置鳳谿長官司以永昌府通判阿鳳爲長官二十四年置永平衛永樂元年賜金齒土官百戶汪用鈔一百錠綵幣四表裏以西平侯沐晟遣用招安罕的法故賞之洪熙元年金齒軍民指揮使司及騰衝守禦千戶所等土官貢馬賜鈔幣宣德五年設金齒軍民指揮司騰衝州置土知州一員時騰衝守禦所土官副千戶張銘言其地遠在極邊麓川宣慰思任發不時侵擾乞設州治帝從之卽以銘爲騰衝知州八年置騰衝州庫扛關庫刀關庫勒關古湧二關先是騰衝州奏本州路通麓川緬甸諸處人

民逃徙者多有悞差發貢獻舊四百夫長隸騰衝千戶所其庫扛關等五處皆軍民兼守今四百夫已隸本州止州民守之乞於五處置巡檢司以土軍尹黑張保李輔郭節等爲巡檢正統二年以非額革之嘉靖元年復設永昌軍民府領州一縣二其長官司二曰施甸曰鳳谿

新化本馬龍他郎二甸阿熒諸部蠻據之元憲宗時內附立爲二千戶所隸寧州萬戶府至元間以馬龍等甸管民官併於他郎甸置司隸元江路洪武初改名馬龍他郎甸長官司直隸雲南布政司後陞爲新化州十七

年以普賜爲馬龍他郎甸副長官宣德八年故長官普賜弟土舍普寧等來朝貢馬賜鈔幣八月黔國公沐晟奏摩沙勒寨萬夫長刀甕及弟刀眷糾蠻兵侵占馬龍他郎甸長官司衙門殺掠人民請遣都督同知沐昂討之帝命遣人撫諭但得刀甕母擾平民正統二年晟等奏甕不服招撫請調附近官土兵令都督昂勦捕帝以蠻衆仇殺乃其本性可仍撫諭之事遂不竟其地有馬龍諸山居摩沙勒江右兩岸束隘如峽地勢極險故改州以鎮之

威遠唐南詔銀生府地舊爲濮落雜蠻所居大理時爲

百夷所據元至元中置威遠州洪武十五年平雲南後改威遠蠻棚府爲威遠州三十五年以上官刀算黨爲威遠知州永樂二年算黨爲車里所擄奪其地命西平侯諭之乃還算黨并侵地三年算黨進象馬方物謝頒降敕諭金字紅牌賜之金帶織金文綺襲衣及銀鈔錦幣二十二年土官刀慶罕等來朝貢馬及方物賜慶罕鈔八十錠紵絲羅紗及頭目以下皆有加宣德三年刀慶罕遣頭目招剛刀著中等來貢賜予如例就令齎敕及織金紵絲紗羅賜之仍給信符勘合底簿八年威遠州奏其地與車里接境累被各土官劫掠播孟實當要

衝乞置巡檢司以把事劉禧爲巡檢從之正統二年土知州刀蓋罕遣人貢馬及銀器賜綵幣等物并以新信符給之正統六年給威遠土知州刀蓋金牌命合兵勦麓川叛寇以捷聞敕曰叛寇思任發侵爾境土脅爾從逆爾母招曩猛能秉大義効忠朝廷悉出金貲分賚頭目爾母子躬擐甲冑賈勇殺賊斬其頭目派罕追逐餘賊過江溺死數千斬首數百得其戰艦戰象仍留兵守賊所據江口地忠義卓然深足嘉尚今特陞爾正五品授奉政大夫修正庶尹封爾母爲太宜人俱錫誥命銀帶及綵幣表裏酬爾母子勛勞陶孟刀孟經等亦賜賚

明史紀事本末 卷四 殉難
有差爾宜益勉忠義以副朕懷時西南諸部多相仇殺
所給金牌信符燒燬不存景泰六年刀蓋罕隨乃吾等
來朝貢因命其管屬本州人民復給與金牌信符織金
文綺賜敕諭遣之成化元年威遠州土舍刀朔罕遣頭
目刀昔思貢象馬并金銀器賜予如例其俗勇健男女
走險如飛境內有河汲水練炭上卽成鹽無秤斗以箕
計多寡量之

北勝唐貞元中南詔異牟尋始開其地名北方睽徙瀾
河白蠻及羅落麼些諸蠻以實其地號成偈睽又改名
善巨郡宋時大理段氏改爲成紀鎮元初內附至元中

置施州尋改北勝州後爲府隸麗江路軍民宣撫司洪武十五年改爲州隸鶴慶府後屬瀾滄衛永樂五年土官百夫長楊克卽牙舊來貢馬賜鈔幣宣德四年土判官高琳子瑛來貢方物請襲父職十年土知府高瑛來朝貢賜鈔幣正統七年以北勝州直隸雲南布政司設流官吏目一員以州蠻苦於瀾滄衛官軍侵漁也萬曆四十八年北勝州土同知高世懋死異母弟世昌襲其族姪蘭妄稱世昌奸生訟之官不聽世昌懼逼走麗江避之尋還至瀾滄宿客舍蘭圍而縱火殺其家七十餘人發其祖父墓自稱欽授把總大掠麗江知府木增請

明史紀事本末 卷一百一十五 列傳一百一十五
討之謂法紀弁髦尾大不掉不治將有隱憂上官嘉其
義調增率其部進勦獲蘭臬之

灣甸蠻名細睽元中統初內附屬鎮康路洪武十七年
置灣甸縣永樂元年三月設灣甸長官司以西平侯沐
晟奏地近麓川地廣人稠故也尋仍改爲灣甸州以土
官刀景發爲知州給印章金牌并置流官吏目一員四
年帝以灣甸道里險遠每歲朝貢令自今三年一貢著
爲令如慶賀謝恩之類不拘此例六年刀景發遣人來
朝貢馬及方物賜鈔幣七年刀景發子景懸等來朝貢
馬賜予如例宣德八年以土官刀景項弟景辦法繼兄

職州有流官吏目一員州鄰木邦順寧日以侵削成化五年灣甸州土官舍人景拙法遣使刀胡猛等來朝貢象馬并金銀器賜宴并衣服綵幣有差萬曆十一年土官景宗真率弟宗材導木邦叛賊罕虔入寇姚關宗真死於陣禽宗材斬之景真子幼貸死降爲州判官後從討猛廷瑞有功復舊職灣甸地多瘴有黑泉漲時飛鳥過之輒墮

鎮康蠻名石睽本黑爇所居元中統初內附至元十三年立鎮康路軍民總管府領三甸洪武十五年改爲鎮康府十七年改爲州永樂二年遣官頒信符及金字紅

牌於鎮康州七年以灣甸同知曩光爲知州初鎮康地隸灣甸曩光請增設署所故有是命九年以中官徐亮使西南蠻曩光阻道詔責之至是遣人來朝謝罪十四年鎮康州長官司遣人貢馬賜鈔幣二十一年知府刀孟廣來朝貢馬宣德三年賜鎮康州土目刀門淵等鈔幣有差成化五年知州刀門戛遣使貢馬及金銀器賜予如例及妻鎮康後亦爲木邦順寧所侵削隆慶間知州悶坎者罕虔妻以女因附虔歸緬坎敗死其弟悶恩歸義恩死子悶枳襲木邦思禮誘之歸緬不從天啟二年木邦兵據喳哩江枳奔姚關守備遣官撫之乃退

大侯蠻名孟祐百夷所居元中統初內附屬麓川路洪武二十四年置大侯長官司永樂二年頒給信符金字紅牌三年大侯長官司長官刀奉偶遣子刀奉董貢馬及銀器賜鈔幣六年長官刀奉偶遣弟不納狂來貢賜予如例宣德四年陞大侯長官司爲大侯州以土官刀奉罕爲知州時刀奉罕奏大侯蠻民復業者多歲納差發銀二百五十兩灣甸鎮康二長官民少歲納差發銀各百兩永樂中俱陞爲州乞援二州例帝諭吏部曰大侯民多復業亦其長官善撫綏也宜增秩旌之故有是命八年大侯州入貢遣內官雲仙往撫之并賜錦綺有

差正統三年土官刀奉漢子刀奉送來貢命齋敕并織金文綺絨錦諸物賜刀奉漢并及其妻初奉漢令把事傳永瑤來朝貢馬奏欲與木邦宣慰罕門法共起土兵十萬協同征勦麓川乞賜金牌信符以安民心特賜之復降敕嘉獎七年敕刀奉漢子刀奉送襲大侯知州賜冠帶印章綵段表裏以奉送能率土兵助討麓川也十一年大侯知州奉外法等貢銀器象馬賜綵幣衣服有差十二年敕賜大侯州奉敬法刀奉送等并其妻綵幣命來使齋與之萬曆中土目奉學壻於順寧知府猛廷瑞後巡撫陳用賓誣奏廷瑞與學反狀廷瑞斬奉學首

以獻學兄赦守大侯如故子奉先與其族舍猛麻奉恭
爭殺抗命次年討平之改爲雲州設流官

瀾滄元爲北勝州地洪武中屬鶴慶府二十八年置瀾
滄衛二十九年於州南築城置今衛司領北勝浪渠永
寧三州永樂四年以永寧州陞爲府正統七年以北勝
州直隸布政司今衛只領州一弘治十一年福建布政
李韶以前任雲南參議知土俗事宜上疏言四事一謂
瀾滄衛與北勝州同一城地域廣遠與四川建昌西番
野番相通邇年西番土舍章輓等倚恃山險招服野番
千餘家爲莊戶遂致各番生拗動輒殺人州官無兵不

明史卷三十四 列傳 三
能禁止衛官大廢軍政恬不加意又姚安府大羅衛賓
川州地方有賊穴六七軍民受害請添設兵備副使於
瀾滄衛城以姚安大羅賓川鶴麗大理洱海景東諸府
州衛所皆令屬之於野番則用撫流民法於賊巢則用
立保甲法朝夕經理則內外寇患皆可弭矣因從其議
設兵備副使一員於瀾滄城

麓川平緬元時皆屬緬甸緬甸古朱波地也宋寧宗時
緬甸波斯等國進白象緬甸之名自此始緬在雲南之
西南最窮遠與八百國占城接壤有城郭室屋人皆樓
居地產象馬元時最强盛元嘗遣使招之始入貢洪武

六年遣使田儼程斗南張禕錢允恭齎詔往諭至安南
留二年以道阻不通有詔召之惟儼還餘皆道卒十五
年大兵下雲南進取大理下金齒平緬與金齒壤地相
接土蠻思倫發聞之懼遂降因置平緬宣慰使司以倫
發爲宣慰使十七年八月倫發遣刀令孟獻方物并上
元所授宣慰使司印詔改平緬宣慰使爲平緬軍民宣
慰使司竝賜倫發朝服冠帶及織金文綺鈔定尋改平
緬軍民宣慰使司爲麓川平緬宣慰使司麓川與平緬
連境元時分置兩路以統其所部至是以倫發遣使貢
命兼統麓川之地十八年倫發反率衆寇景東都督馮

誠率兵擊之值天大霧猝遇寇失利千戶王昇戰死二十年敕諭西平侯沐英等曰近御史李原德歸自平緬知蠻情詭譎必爲邊患符到可卽於金齒楚雄品甸及瀾滄江中道葺壘深池以固營柵多置火銃爲守備寇來勿輕與戰又以往歲人至百夷多貪其財貨不顧事理貽笑諸蠻繼今不許一人往平緬卽文移亦慎答之毋忽明年倫發誘羣蠻入寇馬龍他郎甸之摩沙勒寨英遣都督甯正擊破之斬首千五百餘級倫發悉舉其衆號三十萬象百餘寇定邊欲報摩沙勒之役新附諸蠻皆爲盡力英選師三萬亟趨至賊列象陣搏戰英列

弩注射突陣大呼象多傷其蠻亦多中矢斃蠻氣稍縮
次日英率將士益置火鎗神機箭更番射象奔賊大敗
擣其寨斬首三萬餘級降卒萬餘人象死者半生獲三
十有七倫發遁以捷聞帝遣使諭英移師逼景東屯田
固壘以待大軍集勿輕受其降二十二年倫發遣把事
招綱等來言往者逆謀皆由把事刀廝郎刀廝養所爲
乞貸死願輸貢賦雲南守臣以聞乃遣通政司經歷楊
大用齎敕往諭思倫發修臣禮悉償前日兵費庶免問
罪之師倫發聽命遂以象馬白金方物入貢謝罪大用
并令獻叛首刀廝郎等一百三十七人平緬遂平自是

三年每來朝貢二十七年倫發來朝貢馬象方物已遣京衛千戶郭均英往賜思倫發公服幘頭金帶象笏二十八年緬國王使來言百夷屢以兵侵奪其境明年緬使復來訴帝遣行人李思聰等使緬國及百夷思倫發聞詔俯伏謝罪願罷兵適其部長刀榦孟叛思聰以朝廷威德諭其部衆叛者稍退思倫發欲倚使者服其下強留之以象馬金寶爲賂思聰諭却之歸述其山川人物風俗道路之詳爲百夷傳紀以進帝褒之初平緬俗不好佛有僧至自雲南善爲因果報應之說倫發信之又有金齒戍卒逃入其境能爲火銃火砲之具倫發喜

其技能俾繫金帶與僧位諸部長上刀榦孟等不服遂
與其屬叛攻騰衝倫發率其家走雲南西平侯沐春遣
送至京師帝憫之命春爲征南將軍何福徐凱爲副將
軍率雲南四川諸衛兵往討刀榦孟并遣倫發歸駐潞
江上招諭其部衆賜倫發黃金百兩白金百五十兩鈔
五百錠又敕春曰思倫發窮而歸我當以兵送還若至
雲南先遣人往諭榦孟毋怙終不臣必歸而主倘不從
則聲罪討之時榦孟既逐倫發亦懼朝廷加兵乃遣人
詣西平侯請入貢春以聞三十一年奏榦孟欲假朝廷
威以拒忽都其言入貢未可信帝遣人諭春曰遠蠻詭

詐誠有之姑從所請審度其宜毋失事機春以兵送倫發於金齒使人諭刀榦孟榦孟不從遣左軍都督何福瞿能等將兵五千討之踰高良公山直擣南甸大破之殺刀名孟斬獲甚衆回兵擊景罕寨寨憑高據險堅守不下官軍糧械俱盡賊勢益張福使告急於春春率五百騎往救乘夜至潞江詰旦渡率騎馳躡揚塵蔽天賊不意大軍至驚懼遂破之乘勝擊崆峒寨賊夜潰榦孟遣人乞降事聞朝廷以其狡詐命春俟變討之春尋病卒榦孟竟不降又命都督何福往討未幾禽榦孟歸倫發始還平緬踰年卒永樂元年思倫發子散朋來朝貢

馬賜絨錦織金文綺紗羅并僉從鈔有差二年遣內官
張勤等頒賜麓川平緬木邦孟養俱遣人來貢各
賜之鈔幣時麓川平緬宣慰使思行發所遣頭目刀門
賴訴孟養木邦數侵其地禮部請以孟養木邦朝貢使
付法司正其罪帝謂蠻衆攻奪常事執一二人罪之不
足以革其俗且曲直未明遽罪其使失遠人心命西平
侯諭之遣員外郎左緝使八百國并使賜麓川平緬宣
慰冠帶襲衣五年麓川平緬所隸孟外頭目刀發孟來
朝貢象及金器散朋亦貢馬各賜鈔幣六年思行發貢
馬方物謝賜金牌信符黔國公沐晟言麓川平緬所隸

孟外陶孟土官刀發孟之地爲頭目刀薛孟侵據請命
思行發諭刀薛孟歸侵地從之七年行發來貢遣中官
雲仙等齎敕賜金織文綺紗羅至麓川行發失郊迎禮
仙責之行發惶懼九年遣刀門柰來貢謝罪帝貸之仍
命宴勞其使并遣賜行發文錦金織紵絲紗羅十一年
行發請以其弟思任發代職從之任發遣頭目刀弄發
貢象六馬百匹及金銀器皿等物謝恩二十年任發遣
使奉表來貢并謝侵南甸州罪遣中官雲仙齎賜并敕
戒之洪熙元年遣內官段忠徐亮以卽位詔諭麓川宣
德元年遣使諭西南夷賜麓川錦綺有差以其勤修職

貢也時麓川木邦爭界各訴於朝就令使者諭解之俾
安分毋侵越黔國公沐晟奏麓川所屬思陀甸火頭曲
比爲亂請發兵討帝命姑撫之置麓川平緬宣慰司所
轄大店地驛丞一員以土人刀捧怯爲之從宣慰刀暗
發奏也三年雲南三司奏麓川宣慰使思任發奪南甸
州地請發兵問罪帝命晟同三司巡撫詳計以聞敕任
發保境安民不得侵鄰疆陷惡逆以滋罪咎晟以任發
侵奪南甸騰衝之罪不可宥請發官軍五萬及諸土兵
討之帝以交趾四川方用兵民勞未息宜再行招諭不
得已其調雲南土官軍及木邦宣慰諸蠻兵勦之八年

遣內官雲仙齎敕至麓川賜思任發幣物諭其勿與木
邦爭地抗殺正統元年免麓川平緬軍民宣慰司所欠
差發銀二千五百兩以任發奏其地爲木邦所侵百姓
希少無從辦納部執不可帝特蠲之初洪武間克平雲
南惟百夷部長思倫發未服後爲頭目刀榦孟所逐赴
京陳訴命爲宣慰回居麓川分其地設孟養木邦孟定
三府隸雲南設潞江千崖大侯灣甸四長官司隸金齒
永樂元年陞孟養木邦爲宣慰司孟養宣慰刀木旦與
鄰境仇殺而死緬甸乘機并其地未幾緬甸宣慰新斯
加又爲木邦宣慰所殺時倫發已死子行發襲亦死次

子任發襲爲麓川宣慰狡獪愈於父兄差發金銀不以時納朝廷稍優容之會緬甸之危任發侵有其地遂欲盡復其故地稱兵擾邊侵孟定府及灣甸等州殺掠人民而南甸知州刀貢罕亦奏麓川奪其所轄羅卜思莊等二百七十八村於是晟奏思任發連年累侵孟定南甸干崖騰衝潞江金齒等處自立頭目刀珍罕土官早亨等相助爲暴叛形已著近又侵及金齒勢甚猖獗已遣諸衛馬步官軍至金齒守禦乞調大兵進討朝命選將廷臣舉右都督方政都督僉事張榮往雲南協同鎮守右都督昂率兵討之任發方修貢冀緩師而晟遽信

其降無渡江意任發乃遣衆萬餘奪潞江沿江造船三百艘欲取雲龍又殺死甸順江東等處軍餘殆盡帝以賊勢日甚責晟等玩寇養患政亦至軍欲出戰晟不可政造舟欲濟師晟又不許政不勝憤乃獨率麾下與賊將緬簡戰破賊舊大寨賊奔景罕指揮唐清復擊破之又追之高黎共山下共斬三千餘級乘勝深入逼任發上江上江賊重地也政遠攻疲甚求援於晟晟怒其違節制渡江不遣久之以少兵往至夾象石又不進政追至空泥知晟不救賊出象陣衝擊軍殲政死焉晟聞敗乃請益軍帝遣使者責狀仍調湖廣官軍三萬一千五

百人貴州一萬人四川八千五百人令吳亮馬翔統之至雲南聽晟節制仍敕晟豫籌糧糒而晟懼罪暴卒時任發兵愈橫犯景東剽孟定殺大侯知州刀奉漢等千餘人破孟賴諸寨孟璉長官司諸處皆降之任發仍遣人以象馬金銀來修貢復致番書於雲南總兵官謂始因潞江安撫司線舊法相邀報仇其後線舊法乃誣已爲入寇致大軍壓境惶恐無地今欲遣使謝罪乞爲導奏帝降敕許赦其罪時刑部侍郎何文淵疏請罷麓川師命下廷臣議於是行在兵部尚書王驥及英國公張輔等皆以爲麓川負恩怙惡在所必誅須更選將練兵

以昭天討如思任發早自悔禍縛詣軍門生全之恩取
自上裁帝然之已而侍講劉球復以息兵請如文淵議
部覆以麓川之征已有成命報聞六年以定西伯蔣貴
爲平蠻將軍都督李安劉聚副之以兵部尚書王驥總
督雲南軍務大會諸道兵十五萬討之時任發遣賊將
刀令道等十二人率衆三萬餘象八十隻抵大侯州欲
奪景東威遠而驥將抵金齒任發遣人乞降驥受之密
令諸將分道入右參將冉保從東路攻細甸灣甸水寨
入鎮康趨孟定驥與貴由中路至上江會騰衝左參將
宮聚自下江據夾象石至期合攻之賊拒守嚴銃弩飛

石交下如雨次日乘風焚其柵火竟夜不息官軍力戰拔上江寨斬刀放戛父子禽刀孟頊前後斬馘五萬餘以捷聞七年驥率兵渡下江通高黎貢山道至騰衝留都督李安領兵提備驥由南甸至羅卜思莊前軍抵於木籠時任發率衆二萬餘據高山立硬寨連環七營首尾相應驥遣宮聚劉聚分左右翼緣嶺上驥將中軍橫擊之賊遁軍進馬鞍山擣賊寨寨兩面拒江壁立周迴三十里皆立柵開塹軍不可進而賊從間道潛師出馬鞍山後驥戒中軍毋動命指揮方瑛率精騎六千突入賊寨斬首數百級復誘敗其象陣而從東路者合木邦

人馬招降孟通諸寨元江同知杜凱等亦率車里及大
侯蠻兵五萬招降孟璉長官司并攻破烏木弄戛邦等
寨斬首二千三百餘級齊集麓川守西峨渡就通木邦
信息百道環攻復縱火焚其營賊死不可勝算任發父
子三人并挈其妻孥數人從間道渡江奔孟養搜獲原
給虎符金牌信符宣慰司印及所掠騰衝千戶等印三
十二麓川平捷聞命還師時任發敗走孟蒙復爲木邦
宣慰所擊追過金沙江走孟廣緬甸宣慰卜刺當亦起
兵攻之帝命木邦緬甸能効命禽任發獻者卽以麓川
地與之未幾任發爲緬人禽緬人挾之求地其子思機

發窮困乞來朝謝罪先遣其弟招賽入貢帝命遣還雲
南安置機發窺大兵歸圖恢復據麓川出兵侵擾於是
復命王驥蔣貴等統大軍再征麓川驥率師至金齒機
發遣頭目刀籠肘偕其子詣軍門求降驥遣人至緬甸
索任發緬佯諾不遣驥至騰衝與蔣貴沐昂分五營進
緬人亦聚衆待驥欲乘大師攻之見其衆盛未易拔又
恐多一麓川敵乃宣言犒師而命貴潛焚其舟數百艘
進師薄之緬甸堅執前詔必予地乃出任發復詭以機
發致仇爲解驥乃趨者藍搗機發巢破之機發脫走俘
其妻子部衆立隴川宣慰司而歸時思機發竊據孟養

負固不服自如也十一年緬甸始以任發及其妻孥三十二人獻至雲南任發於道中不食垂死千戶王政斬之函首京師其子機發屢乞降遣頭目刀孟永等修朝貢獻金銀言蒙朝廷調兵征討無地逃死乞貸餘生詞甚哀帝命受其貢因敕總兵官沐斌及參贊軍務侍郎楊寧等以朝廷旣貸思機發以不死經畫善後長策以聞并賜敕諭思機發十二年總兵官黔國公沐斌奏臣遣千戶明庸齎敕招諭思機發以所遣弟招賽未歸疑懼不敢出近緬甸以機發掠其牛馬金銀欲進兵攻取臣等議遣人分諭木邦緬甸諸宣慰司令集蠻兵剋期

過江分道討機發臣等率官軍萬人駐騰衝以助其勢賊四面受敵必成禽矣從之已命授機發弟招賽爲頭目給冠帶月糧房屋隸錦衣衛其從人俱令於馴象所供役先是招賽安置雲南其黨有欲稱亂者乃命招賽來京且冀以招徠機發也帝旣命雲南出兵勦機發及沐斌等至騰衝督諸軍追捕機發終不出潛匿孟養遣其徒來貢許以恩貸復不至斌以春瘴作江漲不可渡糧亦乏引兵還帝以斌師出無功復命兵部尚書靖遠伯王驥總督軍務都督同知宮聚佩平蠻將軍印率南京雲南湖廣四川貴州官軍土軍十三萬人往討之至

是驥凡三征麓川矣帝密諭驥曰萬一思機發遠遁則先禽刀變蠻平其巢穴或遁入緬地緬人黨蔽亦相機禽之庶蠻衆知懼大軍不爲徒出又敕諭斌軍事悉與驥會議而行又敕諭木邦緬甸南甸干崖隴川等宣慰司罕蓋發等各整兵備船積糧以俟調度十四年驥率諸將自騰衝會師由干崖造舟至南牙山舍舟陸行抵沙壩復造舟至金沙江機發於西岸埋柵拒守大軍順流下至管屯適木邦緬甸兩宣慰兵十餘萬亦列於沿江兩岸緬甸備舟二百餘爲浮梁濟師併力攻破其柵寨得積穀四十萬餘石軍飽銳氣增倍賊領衆至鬼哭

山築大寨於兩峰上築二寨爲兩翼又築七小寨綿亘百餘里官軍分道竝進皆攻拔之斬獲無算而思機發思卜發復奔遁時王師踰孟養至孟那孟養在金沙江西去麓川千餘里諸部皆震讐曰自古漢人無渡金沙江者今王師至此真天威也驥還兵其部衆復擁任發少子祿據孟養地爲亂驥等慮師老度賊不可滅乃與思祿約許土目得部勒諸蠻居孟養如故立石金沙江爲界誓曰石爛江枯爾乃得渡思祿亦懼聽命乃班師捷聞帝爲告廟云景泰元年雲南總兵官沐璘奏緬甸宣慰已禽獲思機發又將思卜發放歸孟養恐緬人復

挾爲奇貨不若緩之聽其自獻便從之五年緬人索舊地左參將胡誌等諭以銀戛等處地方與之乃送思機發及其妻孥六人至金沙江村誌等檻送京師南寧伯毛福壽以聞乃誅思機發於京師七年任發子思卜發奏臣父兄犯法時臣幼無知今不敢如父兄所爲甚畏朝廷法謹備差發銀五百兩象三馬六及方物等遣使人入貢惟天皇帝主哀憐因賜敕戒諭并賚思卜發與妻錦幣及其使鈔幣有差成化元年總兵官沐瓚等以思任發之孫思命發至京師乃逆賊遺孽不可留請發沿海登州衛安置月給米二石從之麓川亡先是麓川

之初平也分其地立隴川宣撫使司因以恭項爲宣撫使恭項者故麓川部長首先歸順効力有功因命於麓川故地開設宣撫已頭目曩渙等復來歸願捕賊自効帝命還守本土有功卽加敘諸凡來歸者視此例遂以刀歪孟爲本司同知刀落曩爲副使隴帚爲僉事俱賜冠帶從宣撫恭項請也恭項子恭立來貢給賜如例并授恭立爲長史未幾隴川宣撫失印請再給帝責恭項以不能宣揚國威反失印罪應不宥姑從寬頒給時板蹇據者監寨侵擾隴川百夫長刀門線刀木立進兵圍之斬板蹇等二十三人命賜有功者皆爲冠帶把事并

賚織金文綺正統十一年木邦宣慰罕蓋發來求麓川故地有司以已設隴川宣撫司建官分管以孟止地予之報可十二年敕諭恭項言比者總兵奏爾與百夫長刀木立相仇殺人民懷怨欲謀害爾父子今遷爾於雲南俾不失所且遣官護爾家屬完聚其體憫恤無懷疑懼旣而總兵官言隴川致亂皆由恭項暴殺無辜刻虐蠻人同知刀歪孟爲蠻衆信服乞安置項於別衛以刀歪孟代帝以恭項來歸屈法宥之命於曲靖安置并遣敕往諭景泰七年隴川宣撫多外悶遣人貢象馬及金銀器皿方物賜綵幣襲衣如例仍命齎敕賜之以多外

閔初修朝貢故也成化十九年以隴川宣撫司多歪孟子亨法代職初隴川與木邦相鄰爭地仇殺搆兵不息嘉靖中土舍多鯨刃兄自襲下鎮巡官按問伏辜還職兄子多參詔貰其罪并戒木邦罕孟母得復黨鯨爭職萬曆初緬甸莽瑞體叛來招隴川宣撫多士寧士寧不從其記室岳鳳者江西撫州人黠而多智商於隴川士寧信任之妻以妹鳳曲媚士寧陰奪其權與三宣六慰各土舍罕拔等歃血盟誘士寧往擺古歸附緬酋陰使其子曩烏鳩士寧并殺其妻女奪印投緬受緬僞命代士寧爲宣撫及瑞體死子應裏嗣鳳父子臣服之誘敗

官軍獻土寧母胡氏及親族六百餘人於應裏盡殺之多氏之宗幾盡初鳳之附於緬也爲瑞體招諸部拒中國傷官軍逆勢寢成緬深倚之久之以緬不足恃而鄧川土知州何鈺鳳友壻也初使人招鳳鳳執使獻緬及是鈺復開示百方與之盟誓時官軍亦大集諸將劉綎鄧子龍各率勁師至環壁四面鳳懼乃合妻子及部曲來降綎責令獻金牌符印及蠻莫猛密地乃以送鳳妻子還隴川爲名分兵趨沙木籠山先據其險而自領大兵馳入隴川鳳度無可脫遂詣軍門降綎復率兵進緬緬將先遁留少兵隴川綎攻之鳳子曩烏亦降綎乃攜

鳳父子往攻蠻莫蠻莫賊知鳳降馳報應裏發兵圖隴川挺乘機掩殺賊窘乞降縛緬人及象馬來獻遂招撫孟養賊賊將乘象走追獲之復移師圍孟璉生禽其魁隴川平獻俘於朝帝爲告謝郊廟時萬曆十二年九月也踰年復鑄隴川宣撫司及孟定府印陞孟密安撫爲宣撫司添設安撫司二曰蠻莫曰耿馬長官司二曰孟璉曰孟養千戶所二一居姚關一居孟淋砦皆名之曰鎮安竝鑄印記建大將行署於蠻莫從雲南巡撫劉世曾之議也於是多士寧之子思順襲隴川宣撫使二十九年莽應裏分道入犯一入遮放芒市一入臘撒蠻額

一入杉木籠竝出隴川多思順不敵奔猛卯緬初以猛
卯同知多俺爲嚮導寇東路至是大軍遣木邦罕欽禽
多掩殺之未幾思順死蠻莫思正乘喪襲隴川據其妻
罕氏三十五年思順子安民以守將索賂叛入緬已而
緬聽撫遣安民歸安民久據蠻灣桀驁甚署永騰參將
周會遣二指揮襲之敗績王師亟討其族人挾其弟多
安靖誅之以獻時安靖尚幼勢孤詔俟其長給之印安
民弟安邦治亦附緬後寄居蠻莫其地有馬安摩黎羅
木等山極險峻麓川之所恃爲巢穴者也

明史卷三百十四終